

摘藻堂四庫全書薈要

史部

欽定四庫全書薈要

史部

明史卷一百二十八

六至



詳校官員外郎臣楊世綸

欽定四庫全書薈要卷六千七百十九 史部

明史卷一百二十六

大學士張廷玉等奉 勅修

列傳第十四

李文忠

鄧愈

湯和

沐英

李文忠字思本小字保兒盱眙人太祖姊子也年十二而母死父貞携之轉側亂軍中瀕死者數矣踰二年乃

謁太祖於滁陽太祖見保兒喜甚撫以為子令從已姓
讀書穎敏如素習年十九以舍人將親軍從援池洲破
天完軍驍勇冠諸將別攻青陽石埭太平旌德皆下之
敗元院判阿魯灰於萬年街復敗苗軍於於潛昌化進
攻淳安夜襲洪元帥降其衆千餘授帳前左副都指揮
兼領元帥府事尋會鄧愈胡大海之師取建德以為嚴
州府守之苗帥楊完者以苗獠數萬水陸奄至文忠將
輕兵破其陸軍取所馘首浮巨筏上水軍見之亦遁完

者復來犯與鄧愈擊却之進克蒲江禁焚掠示恩信義
門鄭氏避兵山谷招之還以兵護之民大悅完者死其
部將乞降撫之得三萬餘人與胡大海拔諸暨張士誠
寇嚴州禦之東門使別將出小北門間道襲其後夾擊
大破之踰月復來攻又破之大浪灘乘勝克分水士誠
遣將據三溪復擊敗之斬陸元帥焚其壘士誠自是不
敢窺嚴州進同僉行樞密院事胡大海得漢將李明道
王漢二送文忠所釋而禮之使招建昌守將王溥溥降

苗將蔣英劉震殺大海以金華叛文忠遣將擊走之親撫定其衆處州苗軍亦殺耿再成叛文忠遣將屯縉雲以圖之拜浙東行省左丞總制嚴衢信處諸全軍事吳兵十萬方急攻諸全守將謝再興告急遣同僉胡德濟往援再興復請益兵文忠兵少無以應會太祖使邵榮討處州亂卒文忠乃揚言徐右丞邵平章大將軍刻日進吳軍聞之懼謀夜遁德濟與再興帥死士夜半開門突擊大破之諸全遂完明年再興叛降於吳以吳軍犯

東陽文忠與胡深迎戰於義烏將千騎橫突其陣大敗之已用深策去諸金五十里別築一城以相犄角士誠遣司徒李伯昇以十六萬衆來攻不克踰年復以二十萬衆攻新城文忠帥朱亮祖等馳救去新城十里而軍德濟使人告賊勢盛宜少駐以俟大軍文忠曰兵在謀不在衆乃下令曰彼衆而驕我少而銳以銳禦驕必克之矣彼軍輜重山積此天以富汝曹也勉之會有白氣自東北來覆軍占之曰必勝詰朝會戰時天大霧晦冥

文忠集諸將仰天誓曰國家之事在此一舉文忠不敢
愛死以後三軍乃使元帥徐大興湯克明等將左軍嚴
德王德等將右軍而自以中軍當敵衝會處州援兵亦
至奮前搏擊霧稍開文忠橫槊引鐵騎數十乘高下馳
衝其中堅敵以精騎圍文忠數重文忠手所格殺甚衆
縱騎馳突所向皆披靡大軍乘之城中兵亦鼓譟出敵
遂大潰逐北數十里斬首數萬級溪水盡赤獲將校七
百甲士三千鎧仗芻粟收數日不盡伯昇僅以身免捷

聞太祖大喜召歸宴勞彌日賜御衣名馬遣還鎮明年
秋大軍伐吳令攻杭州以牽制之文忠帥亮祖等克桐
廬新城富陽遂攻餘杭守將謝五再興弟也諭之降許
以不死五與再興子五人出降諸將請僇之文忠不可
遂趨杭州守將潘元明亦降整軍入元明以女樂迎麾
去之營於麗譙下令曰擅入民家者死一卒借民釜斲
以徇城中帖然得兵三萬糧二十萬就加榮祿大夫浙
江行省平江事復姓李氏大軍征閩文忠別引軍屯浦

城以逼之師還餘寇金子龍等聚衆剽掠文忠復討禽

之遂定建延汀三州命軍中收養道上棄兒所全活無

算洪武二年春以偏將軍從右副將軍常遇春出塞薄

上都走元帝語具遇春傳遇春卒命文忠代將其軍奉

詔會大將軍徐達攻慶陽行次太原聞大同圍急謂左

丞趙庸曰我等受命而來闔外之事苟利於國專之可

也今大同甚急援之便遂出雁門次馬邑敗元游兵禽

平章劉特穆爾進至白楊門天雨雪已駐營文忠令移

前五里阻水自固元兵乘夜來擊文忠堅壁不動質明敵大至以二營委之殊死戰度敵疲乃出精兵左右擊大破之禽其將圖魯卜俘斬萬餘人窮追至孟克桑而還明年拜征虜左副將軍與大將軍分道北征以十萬人出野狐嶺至興和降其守進兵察罕諾諾爾禽平章珠占次駱駝山走平章沙布迪音次開平降平章沙達哈等時元帝已崩太子阿裕錫哩達刺新立文忠諜知之魚程趨應昌元嗣君北走獲其嫡子密迪哩巴拉暨

后妃宮人諸王將相官屬數百人及宋元玉璽金寶十

五玉冊二鎮圭大圭玉帶玉斧各一出精騎窮追至北

慶州而還道興州禽國公江文清等降三萬七千人至

紅羅山又降楊思祖之衆萬六千餘人獻捷京師帝御

奉天門受朝賀大封功臣文忠功最授開國輔運推誠

宣力武臣特進榮祿大夫右柱國大都督府左都督封

曹國公同知軍國事食祿三千石予世券四年秋傅友

德等平蜀令文忠往拊循之築成都新城發軍戍諸郡

要害乃還明年復以左副將軍由東道北征出居庸趨和林至坤元人遁進至臚朐河遂令部將韓政等守輜重而自帥大軍入齊二十日糧疾馳至圖拉河元太師曼濟哈喇章悉衆渡河列騎以待文忠引軍薄之敵稍却至鄂爾坤河敵來益衆文忠馬中流矢下馬持短兵鬥指揮李榮以所乘馬授文忠而自奪敵馬乘之文忠得馬益殊死戰遂破敵虜獲萬計追奔至青海敵兵復大集文忠乃歛兵據險椎牛饗士縱所獲馬畜於野敵

疑有伏稍稍引去文忠亦引還失故道至桑噶爾瑪乏
水渴甚禱于天所乘馬跑地泉湧出三軍皆給乃刑牲
以祭遂還是役也兩軍勝負相當而宣寧侯曹良臣指
揮使周顯常張耀俱戰死以故賞不行六年行北平
山西邊敗敵於三角村七年遣部將分道出塞至賽音
布拉克川俘平章陳安里至順寧楊門斬沁珠克壘至
白登禽太尉不花其秋克大寧高州斬宗王托克托錫
哩禽承旨伯嘉努追奔至羶帽山擊斬魯王獲其妃及

司徒塔海等進師豐州禽元故官十二人馬駝牛羊甚衆窮追至伯勒齊乃還是後屢出備邊十年命與韓國公李善長議軍國重事十二年洮州十八番族叛與西平侯沐英合兵討平之築城東籠山南川置洮州衛還言西安城中水鹹鹵不可飲請鑿地引龍首渠入城以便汲從之還掌大都督府兼領國子監事文忠器量沉宏人莫測其際臨陣踔厲風發遇大事益壯頗好學問常師事金華范祖幹胡翰通曉經義為詩歌雄駿可觀

初太祖定應天以軍興不給增民田租文忠請之得減額其釋兵家居恂恂若儒者帝雅愛重之家故多客嘗以客言勸帝少誅僂又諫帝征日本及言宦者過盛非天子不近刑人之義以是積忤旨不免譴責十六年冬遂得疾帝親臨視使淮安侯華中護醫藥明年三月卒年四十六帝疑中毒之貶中爵放其家屬於建昌衛諸醫並妻子皆斬親為文致祭追封岐陽王謚武靖配享太廟肖像功臣廟位皆第三父貞前卒贈隴西王謚恭

獻文忠三子長景隆次增枝芳英皆帝賜名增枝初授
勲衛擢前軍左都督芳英官至中都正留守景隆小字
九江讀書通典故長身眉目疎秀顧盼偉然每朝會進
止雍容甚都太祖數目屬之十九年襲爵屢出練軍湖
廣陝西河南市馬西番進掌左軍都督府事加太子太
傅建文帝即位景隆以肺腑見親任嘗被命執周王橚
及燕兵起長興侯耿炳文討燕失利齊泰黃子澄等共
薦景隆乃以景隆代炳文為大將軍將兵五十萬北征

賜通天犀帶親為推輪餞之江濟令一切便宜行事而

景隆貴公子不知兵惟自尊大諸宿將多怏怏不為用

景隆馳至德州會兵進營河間燕王聞之喜語諸將曰

李九江紈綺少年耳易與也遂命世子居守戒勿出戰

而自引兵援永平直趨大寧景隆聞之進圍北平正月

瞿能攻張掖門垂破景隆忌能功止之及燕軍破大寧

還軍擊景隆景隆屢大敗奔德州諸軍皆潰明年正月

燕王攻大同景隆引軍出紫荆關往救無功而還帝慮

景隆權尚輕遣中官齎書賜黃鉞弓矢獨專征伐方渡江風雨舟壞賜物盡失乃更製以賜四月景隆大誓師於德州會武定侯伯英安陸侯吳傑等於真定合軍六十萬進營白溝河與燕軍連戰復大敗璽書斧鉞皆委棄走德州復走濟南斯役也王師死者數十萬人南軍遂不支帝始詔景隆還黃子澄慚憤執景隆於朝班請誅之以謝天下燕師渡江旁皇甚方孝孺復奏請誅景隆帝皆不問使景隆及尚書茹瑺都督王佐如燕軍割

地請和燕兵屯金川門景隆與谷王穗開門迎降燕王
即帝位授景隆奉天輔運推誠宣力武臣特進光祿大
夫左柱國增歲祿千石朝廷有大事景隆猶以班首主
議諸功臣不平永樂二年周王發其自建文時至邸受
賂事刑部尚書鄭賜等亦劾景隆包藏禍心蓄養亡命
謀及不軌詔勿問已成國公朱能吏部尚書蹇義與文
武羣臣廷劾景隆及弟增枝逆謀有狀六科給事中張
信等復劾之詔削勲號絕朝請以公歸第奉長公主祀

亡何禮部尚書李至剛等復言景隆在家坐受閹人伏
謁如君臣禮大不道增枝多立莊田蓄僮無慮千百人
意叵測於是奪景隆爵並增枝及妻子數十人錮私第
沒其財產景隆嘗絕食旬日不死至永樂末乃卒正統
十三年始下詔令增枝啟門第得自便弘治初錄文忠
後以景隆曾孫璿為南京錦衣衛世指揮使卒子濂嗣
卒子性嗣嘉靖十一年詔封性為臨淮侯祿千石踰年
卒無子復以濂弟沂紹封卒子庭竹嗣屢典軍府提督

操江佩平蠻將軍印鎮湖廣卒子言恭嗣守備南京入
督京營累加少保言恭字惟寅好學能詩折節寒素子
宗城少以文學知名萬厯中倭犯朝鮮兵部尚書石星
主封貢薦宗城才授都督僉事充正使持節往指揮楊
方亨副之宗城至朝鮮釜山倭來益衆道路籍籍言且
刼二使宗城恐變服逃歸而方亨渡海為倭所辱宗城
下獄論戍以其子邦鎮嗣侯明亡爵絕

鄧愈虹人初名友德太祖為賜名父順興據臨濠與元

兵戰死兄友龍代之復病死衆推愈領軍事愈年甫十六每戰必先登陷陣軍中咸服其勇太祖起滁陽愈自盱眙來歸授管軍總管從渡江克太平破禽陳額森畧定溧陽溧水下集慶取鎮江皆有功進廣興翼元帥出守廣德州破長鎬帥謝國璽於城下俘其總管武世榮獲甲士千人移鎮宣州以其兵取績溪與胡大海克徽州遷行樞密院判官守之苗帥楊完者以十萬衆來攻守禦單弱愈激厲將士與大海合擊破走之進拔休寧

婺源獲卒三千徇下高河壘與李文忠胡大海攻建德

道遂安破長鎗帥余子貞逐北至淳安又破其援兵遂

克建德楊完者來攻破禽其將李副樞降溪洞兵三萬

踰月復破完者於烏龍嶺再遷僉行樞密院事畧安臨

李伯昇來援敗之閑林寨遣使出降饒州守將于光遂

移守饒饒濱彭蠡湖與友諒接境數來侵輒擊却之進

江南行省參政總制各翼軍馬取浮梁徇樂平餘千建

昌皆下友諒撫州守將鄧克明為吳宏所攻遣使偽降

以緩師愈知其情卷甲夜馳二百里比明入其城克明
出不意單騎走愈號令嚴肅秋毫不犯遂定撫州克明
不得已降會友諒丞相胡廷瑞獻龍興路改洪都府以
愈為江西行省參政守之而命降將祝宗康泰以所部
從二人初不欲降及奉命從徐達攻武昌遂反舟次女
兒港趨還乘夜破新城門而入愈倉卒聞變以數十騎
走數與賊遇從騎死且盡窘甚連易三馬馬輒踣最後
得養子馬乘之始得奪撫州門以出奔還應天太祖弗

之罪也既而徐達還師復洪都復命愈佐大都督朱文正鎮之其明年友諒衆六十萬入寇樓船高與城等乘漲直抵城下圍數百重愈分守撫州門當要衝友諒親督衆來攻城壞且三十餘丈愈且築且戰敵攻益急晝夜不解甲者三月太祖自將來援圍始解論功與克敵等太祖已平武昌使愈帥兵徇江西未附州縣鄧克明之弟志清據永豐有卒二萬愈擊破之禽其大帥五十餘人從常遇春平沙坑麻嶺諸寨進兵取吉安圍贛州

五月乃克之進江西行省右丞時年二十八兵興諸將
早貴未有如愈與李文忠者愈為人簡重慎密不憚危
苦將軍嚴善撫降附其徇安福也部卒有虜掠者判官
潘樞入謁面責之愈驚起謝趨下令掠民者斬索軍中
所得子女盡出之樞因閉置空舍中自坐舍外作糜食
之卒有謀乘夜劫取者愈鞭之以徇樞悉護遣還其家
民大悅已而遇春克襄陽以愈為湖廣行省平章鎮其
地賜以書曰爾戍襄陽宜謹守法度山寨來歸者兵民

悉仍故籍小校以下悉令屯種且耕且戰爾所戍地鄰

庫庫爾若愛加於民法行於軍則彼所部皆將慕義來

歸如脫虎口就慈母我賴爾如長城爾其勉之愈披荆

棘立軍府營屯拊循招徠威惠甚著吳元年建御史臺

召為右御史大夫領臺事洪武元年兼太子諭德大軍

經畧中原愈為征戍將軍帥襄漢兵取南陽以北未附

州郡遂克唐州進攻南陽敗元兵於瓦店遂北抵城下

遂克之禽史國公等二十六人隨葉舞陽魯山諸州縣

相繼降攻下牛心光石洪山諸山寨均房金商之地悉
定三年以征虜左副副將軍從大將軍出定西庫庫屯
車道峴愈直抵其壘立柵逼之庫庫敗走分兵自臨洮
進克河州招諭吐番諸酋長宣慰何索諾穆溫布等皆
納印降追豫王至西黃河抵黑松林斬其大將河州以
西朶甘烏斯藏諸部悉附出甘肅西北數千里而還論
功授開國輔運推誠宣力武臣特授榮祿大夫右柱國
封衛國公同參軍國事歲祿三千石予世券四年伐蜀

命愈赴襄陽練軍馬運糧給軍士五年辰澧諸蠻作亂以愈為征南將軍江夏侯周德興江陰侯吳良為副討之愈帥楊璟黃彬出澧州克四十八洞又捕斬房州反者六年以右副將軍從徐達巡西北邊十年吐蕃川藏為梗剽貢使愈以征西將軍偕副將軍沐英討之分兵為三道窮追至崑崙山俘斬萬計獲馬牛羊十餘萬留兵戍諸要害乃還道病至壽春卒年四十一追封寧河王謚武順長子鎮嗣改封申國公以征南副將軍平永

新龍泉山寇再出塞有功其妻李善長外孫也善長敗
坐奸黨誅弟銘錦衣衛指揮僉事征蠻卒於軍有子源
為鎮後弘治中授源孫炳為南京錦衣衛世指揮使嘉
靖十一年詔封炳子繼坤定遠侯五傳至文明崇禎末
死流賊之難

湯和字鼎臣濠人與太祖同里閑幼有奇志嬉戲嘗習
射騎部勒羣兒及長身長七尺個儻多計畧郭子興初
起和帥壯士十餘人歸之以功授千戶從太祖攻大洪

山克滁州授管軍總管從取和州時諸將多太祖等夷
莫肯為下和長太祖三歲獨奉約束甚謹太祖甚悅之
從定太平獲馬三百從擊陳額森流矢中左股拔矢復
鬥卒與諸將破禽額森別下漂水句容從定集慶從徐
達取鎮江進統軍元帥徇奔牛呂城降陳保二取金壇
常州以和為樞密院同僉守之常與吳接境張士誠間
謀百出和防禦嚴密敵莫能窺再寇再擊却之俘斬千
計進攻無錫大破吳軍於錫山走莫天祐獲其妻子進

中書左丞以舟師徇黃楊山敗吳水軍獲千戶四十九人拜平章政事援長興與張士信戰城下城中兵出夾擊大敗之俘卒八千解圍而還討平江西諸山寨永新守將周安叛進擊敗之連破其十七寨圍城三月克之執安以獻還守常州從大軍伐士誠克太湖水寨下吳江州圍平江戰於閭門飛礮傷左臂召還應天創愈復往攻克之論功賜金帛初建御史臺以和為左御史大夫兼太子諭德尋拜征南將軍與副將軍吳禎帥常州

長興江陰諸軍討方國珍渡曹娥江下餘姚上虞取慶元國珍走入海追擊敗之獲其大帥二人海舟二十五艘斬馘無算還定諸屬城遣使招國珍國珍詣軍門降得卒二萬四千海舟四百餘艘浙東悉定遂與副將軍廖永忠伐陳友定自明州由海道乘風抵福州之五虎門駐師南臺使人諭降不應遂圍之取平章庫春於城下叅政袁仁請降遂乘城入分兵徇興化漳泉及福寧諸州縣進拔延平執友定送京師時洪武元年正月也

大軍方北伐命造舟明州運糧輸直沽海多颶風輸鎮江而還拜偏將軍從大將軍西征與右副將軍馮勝自懷慶踰太行取澤潞晉絳諸州郡從大將軍拔河中明年渡河入潼關分兵取涇州使部將招降張良臣既而叛去會大軍圍慶陽執斬之又明年復以右副將軍從大將軍敗庫庫於定西遂定寧夏逐北至察罕諾爾禽猛將虎陳獲馬牛羊十餘萬徇東勝大同宣府皆有功還授開國輔運推誠宣力武臣榮祿大夫柱國封中山

侯歲祿千五百石子世券四年拜征西將軍與副將軍
廖永忠帥舟師溯江伐夏夏人以兵扼險攻不克江水
暴漲駐師大江口久不進而傳友德已自秦隴深入取
漢中永忠先驅破瞿塘關入夔州和乃引軍繼之入重
慶降明昇師還友德永忠受上賞而和不及明年從大
將軍北伐遇敵於斷頭山戰敗亡一指揮帝不問尋與
李善長營中都宮闕鎮北平覽彰德城征察罕諾爾大
捷九年巴延特穆爾為邊患以征西將軍防延安巴延

乞和乃還十一年春進封信國公歲祿三千石議軍國
事數出中都臨清北平練軍伍完城郭十四年以左副
將軍出塞征烏爾布哈破敵灰山營獲平章伯爾克樞
密使覺通而還十八年恩州蠻叛以征虜將軍從楚王
討平之俘獲四萬禽其酋以歸和沉敏多智數頗有酒
過守常州時嘗請事於太祖不得醉出怨言曰吾鎮此
城如坐屋脊左顧則左右顧則右太祖聞而銜之平中
原師還論功以和征閩時放遣陳友諒餘孽八郡復擾

師還為秀蘭山賊所襲失二指揮故不得封公伐蜀還面數其逗撓罪頓首謝乃已其封信國公也猶數其常州時過失鑄之券於時帝春秋寢高天下無事魏國曹國皆前卒意不欲諸將久典兵未有以發也和以間從容言臣犬馬齒長不堪復任驅策願得歸故鄉為容棺之墟以待骸骨帝大悅立賜鈔治第中都並為諸公侯治第既倭寇上海帝患之顧謂和曰卿雖老當強為朕一行和請與方鳴謙俱鳴謙國珍從子也習海事常訪

以禦倭策鳴謙曰倭海上來則海上禦之耳請量地遠
近置衛所陸聚步兵水具戰艘則倭不得入入亦不得
傳岸近海民四丁籍一以為軍戍守之可無煩客兵也
帝以為然和乃度地浙西東並海設衛所城五十有九
選丁壯三萬五千人築之盡發州縣錢及籍罪人貲給
役役夫往往過望而民不能無擾浙人頗苦之或謂和
曰民讜矣奈何和曰成遠算者不恤近怨任大事者不
顧謹細復有讜者齒吾劍踰年而城成稽軍次定考格

立賞令浙東民四丁以上者戶取一丁戍之凡得五萬
八千七百餘人明年閩中竝海城工竣和還報命中都
新第亦成和帥妻子陞辭賜黃金三百兩白金二千兩
鈔三千錠彩幣四十有副夫人胡氏賜亦稱是竝降璽
書褒諭諸功臣莫得比焉自是和歲一朝京師二十三
年朝正旦感疾失音帝即臨視惋嘆者久之遣還里疾
小間復命其子迎至都俾以安車入內殿宴勞備至賜
金帛御膳法酒相属二十七年病寢篤不能興帝思見

之詔以安車入覲手拊摩之與叙里閑故舊及兵興艱
難事甚悉和不能對稽首而已帝為流涕厚賜金帛為
葬費明年八月卒年七十追王東甌王謚襄武和晚年
益為恭慎入聞國論一語不敢外泄媵妾百餘病後悉
資遣之所得賞賜多分遣鄉曲見布衣時故交遣老歡
如也當時公侯諸宿將坐姦黨先後麗法稀得免者而
和獨享壽考以功名終嘉靖間東南若倭患和所築沿
海城戍皆堅緻久且不圯浙人賴以自保多歌思之巡

按御史請于朝立廟以祀和五子長子昂為前軍都督
僉事從征雲南道卒少子醴積功至左軍都督同知征
五開卒於軍昂子晟晟子文瑜皆早世不得嗣英宗時
文瑜子傑乞嗣爵竟以歷四十餘年未襲罷之傑無子
以弟倫之子紹宗為後孝宗錄功臣後授紹宗南京錦
衣衛世指揮使嘉靖十一年封靈璧侯食祿千石傳子
至孫世隆隆慶中協守南京兼領後府改提督漕運歷
四十餘年以勞加太子太保進少保卒謚僖敏傳爵至

明亡乃絕和曾孫允勛字公讓為諸生工詩負才使氣
巡撫尚書周忱使作啟事即席具數萬言忱薦之朝少
保于謙召詢古今將畧及兵事允勛應對如響累授錦
衣千戶偕中書舍人趙榮通問英宗於沙漠托克托布
哈問中朝事慷慨酬答不少屈景泰中用尚書胡濙薦
署指揮僉事天順中錦衣領事者撫允勛舊事以聞謫
為民成化復故官三年擢署都指揮僉事為延綏東路
叅將分守孤山堡孤山最當寇衝允勛奏請築城聚糧

增兵戍守未報寇大至允勸病力疾上馬陷伏死事聞
祭如例

沐英字文英定遠縣人少孤從母避兵母死太祖與孝
慈皇后憐之撫為子從朱姓年十八授帳前都尉守鎮
江稍遷指揮使守廣信已從大軍征福建破分水關畧
崇安別破閔溪十八寨縛馮谷保始命復姓移鎮建寧
節制邵武延平汀州三衛尋遷大都督府僉事進同知
府中機務繁積英年少明敏剖決無滯后數稱其才帝

亦罷重之洪武九年命乘傳詣闕陝抵熙河問民疾苦
事有不便更置以聞明年充征西副將軍從衛國公鄧
愈討吐番西畧川藏耀兵崑崙功多封開國輔運推誠
宣力武臣榮祿大夫柱國西平侯食祿二千五百石子
世券明年拜征西將軍討西番敗之土門峽徑洮州獲
其長阿察錫納築城東籠山擊禽酋長三副使癭嗉子
等平朶甘納兒七站拓地數千里俘男女二萬雜畜二
十餘萬乃班師元國公托齊濟等屯和林數擾邊十三

年命英總陝西兵出塞畧額齊訥路渡黃河登賀蘭山

涉流沙七日至其境分四翼夜擊之而自以驍騎衝其

中堅禽托和齊及知院按珠等獲其全部以歸明年又

從大將軍北征異道出塞畧公主山長寨克全寧四部

度臚朐河執知院李宣盡俘其衆尋拜征南右副將軍

同永昌侯藍玉從將軍傅友德取雲南元梁王遣平章

達爾瑪以十餘萬拒於曲靖英乘霧趨白石江及霧霽

兩軍相望達爾瑪大驚友德欲渡江英曰我兵罷懼為

所扼及帥諸軍嚴陳若將渡者而奇兵從下流濟出其
陳後張疑幟山谷人吹一銅角元兵驚擾英急麾衆軍
渡江以善泅者先之長刀斫其軍軍却師畢濟鏖戰良
久復縱鐵騎遂大敗之生禽達爾瑪僵屍十餘里長驅
入雲南梁王走死右丞觀音保以城降屬郡皆下獨大
理倚點蒼山洱海扼龍首龍尾二關關故南詔築土酋
段世守之英自將抵下關遣王弼由洱水東趨上關胡
海由石門間道渡河拔點蒼山而上立旗幟英亂流斬

關進山上軍亦馳下夾擊段世遂拔大理乃分兵收未
附諸蠻設官立衛守之回軍與友德會滇池分道平烏
撒東川建昌芒部諸蠻立烏撒畢節二衛土酋楊苴等
復煽諸蠻二十餘萬圍雲南城英馳救蠻潰竄山谷中
分兵捕滅之斬級六萬明年詔友德及玉班師而留英
鎮滇中十七年曲靖亦佐酋作亂討降之因定普定廣
南諸蠻通田州糧道二十年平浪穹蠻奉詔自永寧至
大理六十里設一堡留軍屯田明年百夷思倫發叛誘

羣蠻入寇摩沙勒寨遣都督寧正擊破之二十二年思
倫發復寇定邊衆蠻三十萬英選騎三萬馳救置火礮
勁弩為三行蠻毆百象被甲荷欄楯左右挾大竹為筒
筒置剽槍銳甚英分軍為三都督馮誠將前軍寧正將
左都指揮同知湯昭將右將戰令曰今日之事有進無
退因乘風大呼礮弩並發象皆反走昔刺亦者寇梟將
也殊死鬥左軍小却英登高望之取佩刀命左右斬帥
首來左帥見一人握刀馳下恐奮呼突陣大軍乘之斬

馘四萬餘人生獲三十七象餘象盡殪賊渠帥各被百餘矢伏象背以死思倫發遁去諸蠻震懼麓川始不復梗已會潁國公傳友德討平東川蠻又平越州酋阿資及廣西阿赤部是年冬入朝賜宴奉天殿賚黃金二百兩白金五千兩鈔五百錠綵幣百疋遣還陞辭帝親拊之曰使我無南顧憂者汝英也還鎮再敗百夷於景東思倫發乞降貢方物阿資又欲叛再擊降之南中悉定使使以兵威諭降諸番番部有重譯入貢者二十五年

六月聞皇太子薨哭極哀初高皇后崩英哭至嘔血至是感疾卒於鎮年四十八軍民巷哭遠夷皆為流涕歸葬京師追封黔寧王謚昭靖侑享太廟英沉毅寡言笑好賢禮士撫卒伍有恩未嘗妄殺在滇百務具舉簡守令課農桑歲較屯田增損以為賞罰墾田至百萬餘畝滇池隘浚而廣之無復水患通鹽井之利以來商旅辦方物以定貢稅視民數以均力役疎節濶目民以便安居常讀書不釋卷暇則延諸儒生講說經史太祖初起

時數養他姓為子攻下郡邑輒遣之出守多至二十餘人惟英在西南勲最大子春晟昂皆鎮雲南昕駙馬都尉尚成祖女常寧公主春字景春材武有父風年十七從英征西番又從征雲南從平江西寇皆先登積功授後軍都督府僉事羣臣請試職帝曰兒我家入勿試也遂予實授嘗命錄烈山囚又命鞠叛黨於蔚州所開釋各數百人英卒命嗣爵鎮雲南洪武二十六年維摩十一寨亂遣瞿能討平之明年平越雋蠻立瀾滄衛其冬

阿資復叛與何福討之春曰此賊積年逋誅者以與諸

土酋姻婭輾轉亡匿今悉發諸酋從軍縻繫之而多設

營堡制其出入授首必矣遂趨越州分道逼其城伏精

兵道左以營卒誘賊縱擊大敗之阿資亡山谷中春陰

結旁近土官詢知所在樹壘斷其糧道賊困甚已出不

意擣其巢遂禽阿資並誅其黨二百四十人越州遂平

廣南酋儂偵佑糾黨蠻拒官軍破禽之俘斬千計寧遠

酋刀拜爛依交趾不順命遣何福討降之三十年麓川

宣慰使思倫發為其屬刀幹孟所逐來奔春挾與俱朝
受上方畧遂拜春為征虜前將軍帥何福徐凱討之先
以兵送思倫發於金齒檄幹孟來迎不應乃選卒五千
令福與瞿能將踰高良公山直擣南甸大破之斬其首
刀名孟回軍擊景罕寨賊乘高堅守官軍糧且盡福告
急春帥五百騎救之夜渡怒江旦抵寨下令騎騁揚塵
蔽天賊大驚潰乘勝擊崆峒寨亦潰前後降者七萬人
將士欲屠之春不可幹孟乞降帝不許命春總滇黔蜀

兵攻之未發而春卒年三十六謚惠襄春在鎮七年大修屯政闢田三十餘萬畝鑿鐵池河灌宜良涸田數萬畝民復業者五千餘戶為立祠祀之無子弟晟嗣晟字景茂少凝重寡言笑喜讀書太祖愛之歷官後軍左都督建文元年嗣侯比就正而何福已破禽刀幹孟歸思倫發亡何思倫發死諸蠻分據其地晟討平之以其地為三府二州五長官司又於怒江西置屯衛千戶所戍之麓州遂定初岷王封雲南不法為建文帝所囚成祖

即位遣歸藩益驕恣晟稍持之王怒譖晟帝以王故詔
誠晟貽書岷王稱其父功毋督過永樂三年八百大甸
寇邊遏貢使晟會車里木邦討定之明年大發兵討交
趾拜晟征夷左副將軍與大將軍張輔異道自雲南入
遂由蒙自經野蒲斬木通道奪猛烈棚華諸關隘舁舟
夜出洮水渡富良江與輔會師共破多邦城擣其東西
二都盪諸巢禽偽王黎季犛語在輔傳論功封黔國公
歲祿三千石子世券交趾簡定復叛命晟佩征夷將軍

印討之戰生厥江敗績輔再出帥師合討禽定送京師
輔還晟留捕陳季擴連戰不能下輔復出帥師會晟窮
追至占城獲季擴乃班師晟亦受上賞十七年富州蠻
叛晟引兵臨之弗攻使人譬曉竟下之仁宗立加太傅
鑄征南將軍印給之沐氏繼鎮者輒予印以為常宣德
元年交趾黎利勢熾詔晟會安遠侯柳升進討升敗死
晟亦退兵羣臣交劾晟帝封其章示之正統三年麓川
思任發反晟抵金齒與弟昂及都督方政會兵政為前

鋒破賊沿江諸寨大軍逐北至高麗共山下再破之明年復破其舊寨政中伏死官軍敗績晟引還慚懼發病至楚雄卒贈定遠王謚忠敬晟席父兄業用兵非所長戰數不利朝廷以其絕遠且世將寬假之而滇人懾晟父子威信莊事如朝廷片楮下土酋具威儀出郭迎盟而後啟曰此今旨也晟久鎮置田園三千六十區資財充叔善事朝貴賂遺不絕以故得中外聲晟有子斌字文輝幼嗣公爵居京師而以昂代鎮昂字景高初為府

軍左衛指揮僉事成祖將使晟南討乃擢昂都指揮同知領雲南都司累遷至右都督正統四年佩將印討麓川抵金齒畏賊盛遷延者久之叅將張榮前馳至芒部敗昂不救引還貶秩二級已思任發入寇擊却之又捕斬師宗反者六年兵部尚書王驥定西伯蔣貴將大軍討思任發昂主餽運賊破復昂職命都督軍捕任發不能得十年昂卒贈定邊伯謚武康斌始之鎮會緬甸執思任發送京師其子思機發來襲斌擊却之思機發復

據孟養十三年復大發兵使驥等討之而斌為後拒督
餉無乏卒贈太傅謚榮康子宗幼景泰初命昂孫璘以
都督同知代鎮璘字廷章素儒雅滇人易之既而號令
肅然不可犯天順初卒琮猶幼擢璘弟錦衣副千戶瓚
為都督同知往代居七年先後討平霑祿諸寨及土官
之構兵者降思卜發勒還諸蠻侵地功多然頗黷貨成
化三年春琮始之鎮而以瓚為副總兵移鎮金齒琮字
廷芳通經義能詞章屬夷覬覦無所受尋甸酋殺兄子

求為守琮捕誅之廣西土官虐所部為亂琮請更設流
官民大便以次討平馬龍麗江劍川順寧羅雄諸叛蠻
捕禽橋田南窩反者卒贈太師謚武僖無子以璣孫崑
嗣崑字元中初襲錦衣指揮僉事琮撫為子朝議以崑
西平侯裔孫當嗣侯而守臣爭之謂滇人知黔國公不
知西平侯也侯之恐為所輕孝宗以為然令嗣公佩印
如故弘治十二年平龜山竹箐諸蠻又平普安賊再益
歲祿正德二年師宗民阿本作亂與都御史吳文度督

兵分三道進一出師宗一出羅雄一出彌勒而別遣一軍伏盤江截賊巢遂大破之七年安南長官司那代爭襲殺土官復與都御史顧源討禽之再加太子太傅崑初喜文學自矜厲其後通賂權近所請無不得寢驕凌三司使從角門入諸言官論劾者輒得罪去卒贈太師謚莊襄子紹勛嗣尋甸土舍安銓叛都御史傅習討之敗績武定土舍鳳朝文亦叛與銓連兵攻雲南大擾世宗遣尚書伍文定將大軍征之未至而紹勛督所部先

進告土官子弟當襲者先予冠帶破賊後當為請衆多
奮戰賊大敗朝文絕普渡河追斬之東川銓還走尋甸
列砦數十官軍攻破之禽銓於芒部先後禽賊黨千餘
人俘斬無算時嘉靖七年也捷聞加太子太傅益歲祿
而是時老撾木邦孟養緬甸孟密相仇殺師宗納樓思
陀八寨皆亂久不解紹勛使使者徧歷諸蠻諷以武定
尋甸事皆懾伏願還侵地而木邦孟養俱貢方物謝罪
南中悉定紹勛有勇畧用兵輒勝卒贈太師謚敏靖子

朝輔嗣都御史劉渠索賂朝輔與之因上章言臣家世
守茲土上下相承今有司紛更典制闕臣職守率不與
聞接見不循故例臣踈遠孤危動作掣肘無以彈壓蠻
方乞申救諸臣悉如其舊詔許之給事中萬虞愷劾朝
輔竝論渠詔罷渠而令朝輔治事如故卒贈太保謚恭
僖二子融翬皆幼詔視琮璘故事令融嗣公給半祿而
授朝輔弟朝弼都督僉事佩印代鎮居三年融卒翬當
嗣朝弼心害之於是朝弼嫡母李請護翬居京師待其

長而還鎮報可鞏未至京卒朝弼遂得嗣嘉靖三十年
元江土舍那鑑叛詔朝弼與都御史石簡討之分五軍
薄其城城垂拔以瘴發引還詔罷簡將再出師鑑懼仰
藥死乃已四十四年討禽叛蠻阿方李向陽隆慶初平
武定叛酋鳳繼祖破賊巢三十餘朝弼素驕事母嫂不
如禮奪兄田宅匿罪人蔣旭等用調兵火符遣人訶京
師乃罷朝弼以其子昌祚嗣給半祿朝弼怏怏益放縱
莫母至南京都御史請留之詔許還滇母得預滇事朝

弼志欲殺昌祚撫按交章言狀竝發其殺人通番諸不法事逮繫詔獄論死援功錮之南京卒昌祚初以都督僉事總兵官鎮守久之嗣公爵萬厯元年姚安蠻羅思等叛殺郡守昌祚與都御史鄒應龍發土漢兵討之破向寧鮚摩等十餘寨犂其巢盡得思等十一年隴川賊岳鳳叛附緬甸挾其兵侵旁近土司昌祚壁洱海督裨將鄧子龍劉綎等斬木邦叛酋罕虔以暑瘴退師明年復攻罕虔故巢三道竝入禽其酋罕招等又破緬兵於

猛臉岳鳳降論功加太子太保悉食故祿復以次平羅
雄諸叛蠻再賜銀幣緬兵攻猛廣昌祚會師壁永昌緬
人遁追擊至那莫江漳作還二十一年春緬人復入寇
昌祚逐之連戰俱捷遂傳於緬會羣蠻內亂乃還沐氏
在滇久威權日盛尊重擬親王昌祚出僉事楊寅秋不
避道昌祥答其輿人寅秋訴於朝下詔切責已以病命
子獻代鎮武定土酋阿克叛攻會城脅府印去獻被逮
下獄昌祚復理鎮事卒孫啟元嗣卒子天波嗣十餘年

而土司沙定洲作亂天波奔永昌亂定復歸於滇永明
王由榔入滇天波任職如故已從奔緬甸緬人欲劫之
不屈死初定沙洲之亂天波母陳氏妻焦氏自焚死後
天波奔緬娶夏氏不及從自縊死踰數十日收葬支體
不壞人以為節義所感焉

贊曰明興諸將以六王為稱首非獨功茂亦由其忠誠
有以契主知焉親莫如岐陽舊莫如東甌而寧河黔寧
皆以英年膺腹心之寄汗馬宣勞純勤不二旂常炳耀

洵無愧矣岐陽敦書說禮以儒雅見重東甌乞身歸第
以名哲自全皆卓然非人所能及獨默寧威震遐荒剖
符奕世勲名與明相始終而寧和盡瘁馳驅功高齡促
後嗣亦少所表見論者謂諸王之遺澤隆替有殊然而
中山有增壽與岐陽之有景隆追溯先烈不無遺憾榮
遇之弗齊亦安見其有幸有不幸哉

明史卷一百四十六

欽定四庫全書

明史卷一百二十六考證

李文忠傳年十二而母死

臣

方煒按李文忠母歿之

年史刻本作年十二考焦雄獻徵錄亦同惟朱國楨
開國臣傳稱文忠來歸時年十五公主薨已二年是
文忠十三歲時公主乃歿與史文小異但無憑折衷
謹附識如左

李文忠傳

子景隆附

都督瞿能攻張掖門垂破景隆忌

能功止之

臣按煒按張掖門瞿能傳亦載之但考

遼金元明四史地理志及春明夢餘錄日下舊聞均
無此門名惟查金史燕京西門有名彰意者雖由元
至明已非其舊或當時猶沿呼其名而方言土語音
轉多訛遂呼為張掖耳謹考訂而仍其舊

鄧愈傳其明年友諒衆六十萬入寇

臣方煒按陳友

諒圍洪都之衆開國臣傳稱五十萬史作六十萬傳
維鱗明書亦作六十萬或當時文報多寡偶殊沿襲

書之無從訂正謹考異而仍其舊

鄧愈傳今克明之弟志清據永豐有卒二萬愈擊破之

臣方煒按考獻徵錄開國臣傳均以據永豐者為

鄧青史作鄧克明之弟志清他無可考謹識以闕疑

湯和傳十八年思州蠻叛以征虜將軍從楚王討平之

臣方煒按開國臣傳稱十八年湯和從楚王討平

古州蠻不作思州又考獻徵錄十八年五開山獠為

亂王帥師討平之俘戮四萬人亦即此事也史作思

州不知何據謹識闕疑

沐英傳是年冬入朝賜宴奉天殿賚黃金二百兩白金
五千兩鈔五百錠綵幣百疋

臣方煒按沐英賜鈔

數目開國臣傳作鈔五千錠獻徵錄又作鈔二萬五
千貫陳金三家世典又作七萬五千貫與史書五百
錠者多寡迥別當時傳聞異辭遂各就所見書之不
及詳考耳謹識如左

明史卷一百二十六考證

欽定四庫全書薈要卷六千七百二十史部

明史卷一百二十七

大學士張廷玉等奉 敕修

列傳第十五

李善長

汪廣洋

李善長字百室定遠人少讀書有智計習法家言策事
多中太祖畧地滁陽善長迎謁知其為里中長者禮之
留掌書記嘗從容問曰四方戰鬪何時定乎對曰秦亂

漢高起布衣豁達大度知人善任不嗜殺人五載成帝
業今元綱既紊天下土崩瓦解公濠產距沛不遠山川
王氣公當受之法其所為天下不足定也太祖稱善從
下滁洲為參謀預機畫主饋餉甚見親信太祖威名日
盛諸將來歸者善長察其材言之太祖復為太祖布款
誠使皆得自安有以事力相齟齬者委曲為調護郭子
興中流言疑太祖稍奪其兵柄又欲奪善長自輔善長
固謝弗往太祖深倚之太祖軍和陽自將擊雞籠山寨

少留兵佐善長居守元將諜知來襲設伏敗之太祖以
為能太祖得巢湖水師善長力贊渡江既拔采石趨太
平善長預書榜禁戢士卒城下即揭之通衢肅然無敢
犯者太祖為太平興國翼大元帥以為帥府都事從克
集慶將取鎮江太祖慮諸將不戢下乃佯怒欲置諸法
善長力救得解鎮江下民不知有兵太祖為江南行中
書省平章以為參議時宋思顏李夢庚郭景祥等俱為
省僚而軍機進退賞罰章程多決於善長改樞密院為

大都督府命兼領府司馬進行省參知政事太祖為吳王拜右相國善長明習故事裁決如流又嫻於辭命太祖有所招納輒令為書前後自將征討皆命居守將吏帖服居民安堵轉調兵餉無乏嘗請權兩淮鹽立茶法皆斟酌元制去其弊政既復制錢法開鐵冶定漁稅國用益饒而民不困吳元年九月論平吳功封善長宣國公改官制尚左以為左相國太祖初渡江頗用重典一日謂善長法有連坐三條不已甚乎善長因請自大逆

而外皆除之遂命與中丞劉基等裁定律令頒示中外
太祖即帝位追帝祖考及冊立后妃太子諸王皆以善
長充大禮使置東宮官屬以善長兼太子太師授銀青
榮祿大夫上柱國錄軍國重事餘如故己帥禮官定郊
社宗廟禮帝幸汴梁善長留守一切聽便宜行事尋奏
定六部官制議官民喪服及朝賀東宮儀奉命監修元
史編祖訓錄大明集禮諸書定天下獄瀆神祇封號封
建諸王爵賞功臣事無巨細悉委善長與諸儒臣謀議

行之洪武三年大封功臣帝謂善長雖無汗馬勞然事朕久給軍食功甚大宜進封大國乃授開國輔運推誠守正文臣特進光祿大夫左柱國太師中書左丞相封韓國公歲祿四千石子孫世襲予鐵券免二死子免一死時封公者徐達常遇春子茂李文忠馮勝鄧愈及善長六人而善長位第一制詞比之蕭何褒稱甚至善長外寬和內多愷刻參議李飲冰楊希聖稍侵善長權即按其罪奏黜之與中丞劉基爭法而詢基不自安請告

歸太祖所任張昶楊憲汪廣洋胡惟庸皆獲罪善長事
寄如故貴富極意稍驕帝始微厭之四年以疾致仕賜
臨濠地若干頃置守塚戶百五十給佃戶千五百家儀
仗士二十家踰年病愈命董建臨濠宮殿徙江南富民
十四萬田濠州以善長經理之留濠者數年七年擢善
長弟存義為太僕丞存義子伸佑皆為羣牧所官九年
以其子祺尚臨安公主拜駙馬都尉初定婚禮公主修
婦道甚肅光寵赫奕時人艷之祺尚主後一月御史大

夫汪廣洋陳寧疏言善長狎寵自恣陛下病不視朝幾及旬不問候駙馬都尉祺六日不朝宣至殿前又不引罪大不敬坐削歲祿千八百石尋命與曹國公李文忠總中書省大都督府御史臺同議軍國大事督園丘工丞相胡惟庸初為寧國知縣以善長薦擢太常少卿後為丞相因相往來而善長弟存義子佑惟庸從女壻也十三年惟庸謀反伏誅坐黨死者甚衆善長如故御史臺缺中丞以善長理臺事數有所建白十八年有人告

存義父子實惟庸黨者詔免死安置崇明善長不謝帝
銜之又五年善長年已七十有七耄不檢下嘗欲營第
從信國公湯和假衛卒三百人和密以聞四月京民坐
罪應徙邊者善長數請免其私親丁斌等帝怒按斌斌
故給事惟庸家因言存義等往時交通惟庸狀命逮存
義父子鞠之詞連善長云惟庸有反謀使存義陰說善
長善長驚叱曰爾言何為者審爾九族皆滅已又使善
長故人楊文裕說之云事成當以淮西地封為王善長

驚不許然頗心動惟庸乃自往說善長猶不許居久之
惟庸復遣存義進說善長歎曰吾老矣吾死汝等自為
之或又告善長云將軍藍玉出塞至捕魚兒海獲惟庸
通沙漠使者封績善長匿不以聞於是御史交章劾善
長而善長奴盧仲謙等亦告善長與惟庸通賂遺交私
語獄具謂善長元勲國戚知逆謀不發舉狐疑觀望懷
兩端大逆不道會有言星變其占當移大臣遂并其妻
女弟姪家口七十餘人誅之而吉安侯陸仲亨延安侯

唐勝宗平涼侯費聚南雄侯趙庸蒙陽侯鄭遇春宜春侯黃彬河南侯陸聚等皆同時坐惟庸黨死而已故營陽侯楊璟濟寧侯顧時等追坐者又若干人帝手詔條列其罪傳著獄辭為昭示姦黨三錄布告天下善長子祺與主徙江浦久之卒祺子芳茂以公主恩得不坐芳為留守中衛指揮茂為旗手衛鎮撫罷世襲善長死之明年虞部郎中王國用上言善長與陛下同心出萬死以取天下勲臣第一生封公死封王男尚公主親戚拜

官人臣之分極矣藉令欲自圖不軌尚未可知而今謂其欲佐胡惟庸者則大謬不然人情愛其子必甚於兄弟之子安享萬全之富貴者必不僥倖萬一之富貴善長與惟庸猶子之親耳於陛下則親子女也使善長佐惟庸成不過勲臣第一而已矣太師國公封王而已矣尚主納妃而已矣寧復有加於今日且善長豈不知天下之不可倖取當元之季欲為此者何限莫不身為齎粉覆宗絕祀能保首領者幾何人哉善長胡乃身見之

而以衰倦之年身蹈之也凡為此者必有深讐激變大不得已父子之間或至相挾以求脫禍今善長之子祺備陛下骨肉親無纖芥嫌何苦而忽為此若謂天象告變大臣當災殺之以應天象則尤不可臣恐天下聞之謂功如善長且如此四方因之解體也今善長已死言之無益所願陛下作戒將來耳太祖得書竟亦不罪也汪廣洋字朝宗高郵人流寓太平太祖渡江召為元帥府令史江南行省提控置正軍都諫司擢諫官遷行省

都事累進中書右司郎中尋知驍騎衛事參常遇春軍
務下贛州遂居守拜江西參政洪武元年山東平以廣
洋廉明持重命理行省撫納新附民甚安之是年召入
為中書省參政明年出參政陝西三年李善長病中書
無官召廣洋為右丞時左丞楊憲專決事廣洋依違之
猶為所忌嗾御史劾廣洋奉母無狀帝切責放還鄉憲
再奏徙海南憲誅召還其冬封忠勤伯食祿三百六十
石誥詞稱其剴繁治劇屢獻忠謀比之子房孔明及善

長以病去位遂以廣洋為右丞相參政胡惟庸為左丞
廣洋無所建白久之左遷廣東行省參政而帝心終善
廣洋復召為左御史大夫十年復拜右丞相廣洋頗耽
酒與惟庸同相浮沉守位而已帝數誡諭之十二年十
二月中丞涂節言劉基為惟庸毒死廣洋宜知狀帝問
之對曰無有帝怒責廣洋朋欺貶廣南舟次太平帝追
怒其在江西曲庇文正在中書不發楊憲姦賜敕誅之
廣洋少師余闕淹通經史善篆隸工為歌詩為人寬和

自守與姦人同位而不能翦除故及於禍

贊曰明初設中書省置左右丞相筦領樞要率以勲臣領其事然徐達李文忠等數受命征討未嘗專理省事其從容丞弼之任者李善長汪廣洋胡惟庸三人而已惟庸敗後丞相之官遂廢不設故終明之世惟善長廣洋得稱丞相獨惜善長以布衣徒步能擇主於草昧之初委身勳力贊成鴻業遂得剖符開國列爵上公乃至富極貴溢於衰暮之年自取覆滅廣洋謹厚自守亦不

能發姦遠禍俱致重譴不亦大負爰立之初心而有愧
置諸左右之職業也夫

明史卷一百二十七終

欽定四庫全書

明史卷一百二十七考證

李善長傳太祖得巢湖水師善長力贊渡江

臣

章宗

瀛按明太祖欲謀渡江善長曰我衆患食少舟楫不
備不足以爭江左利姑少俟之巢湖將廖永安俞通
海等以舟師萬餘糧數萬石請附善長乃說太祖曰
天贊我也渡江此其時矣遂破曼濟哈雅兵而拔采
石見明實錄謹附考

李善長傳嘗請榷兩淮鹽立茶法皆斟酌元制去其弊
政臣章宗瀛按太祖初起兵即立鹽法置局設官
令商人販鬻二十取一以資軍餉既而倍征之後五
年始置兩淮鹽官茶則令商於產茶地買茶納錢請
引引茶百斤輸錢二百不及引曰畸零另置由帖給
之即位後皆本初釐定見明會典及食貨志謹附備
考

李善長傳既復制錢法開鐵冶定漁稅

臣章宗瀛按

太祖初置寶源局於應天鑄大中通寶錢與歷代錢
兼行以四百文為一貫四文為一錢及克隆興路改
為洪都府置錢局三所頒大中通寶錢大小五等錢
式鐵冶先開於湖廣而漁稅則終明一代隸河泊所
惟設於大河以南見明會典及食貨志謹附考

李善長傳與中丞劉基爭法而詢基不自安請告歸

臣章宗瀛按洪武元年太祖幸汴使善長與劉基居
守中書省都事李彬坐貪縱抵罪善長素暱之請緩

其獄基不聽馳奏報可方祈雨即斬之由是忤善長
譖基太祖知之賜善長手敕切責之削祿一千四百
石傳未載見明寶錄謹附考

李善長傳十三年惟庸謀反伏誅坐黨死者甚衆善長
如故臣章宗瀛按惟庸伏誅後羣臣請並罪善長
上曰此吾初起時股肱心腹其勿問見雷禮列卿記
謹附識

汪廣洋傳召廣洋為右丞時左丞楊憲專決事廣洋依

違之猶為所忌嗾御史劾廣洋奉母無狀帝切責放
還鄉憲再奏徙海南憲誅召還

臣章宗瀛按是時

李善長奏憲排陷大臣放肆為奸上命按治憲伏誅
見雷禮列卿記謹附識

汪廣洋傳御史劾廣洋奉母無狀

臣章宗瀛按劾廣

洋御史為劉炳見明實錄謹附考

汪廣洋傳遂以廣洋為右丞相參政

臣章宗瀛按廣

洋以洪武七年八月加祿至一千九百石見明實錄

傳未載謹附考

明史卷一百二十七考證

欽定四庫全書薈要卷六千七百二十一

史部

明史卷一百二十八

大學士張廷玉等奉 敕修

列傳第十六

劉基

子

璉

宋濂

葉琛

章溢

子存道

劉基字伯溫青田人曾祖濠仕宋為翰林掌書宋亡邑
子林融倡義旅事敗元遣使簿錄其黨多連染使道宿

濠家濠醉使者而焚其廬籍悉毀使者計無所出乃為
更其籍連染者皆得免基幼穎異其師鄭復初謂其父
燭曰君祖德厚此子必大君之門矣元至順間舉進士
除高安丞有廉直聲行省辟之謝去起為江浙儒學副
提舉論御史失職為臺臣所阻再投劾歸基博通經史
於書無不窺尤精象緯之學西蜀趙天澤論江左人物
首稱基以為諸葛孔明儔也方國珍起海上掠郡縣有
司不能制行省復辟基為元帥府都事基議築慶元諸

城以逼賊國珍氣沮及左丞托里特穆爾招諭國珍基
言方氏兄弟首亂不誅無以懲後國珍懼厚賂基基不
受國珍乃使人浮海至京賄用事者遂詔撫國珍授以
官而責基擅威福羈管紹興方氏遂愈橫俄山寇蜂起
行省復辟基勦捕與行院判舒穆魯伊遜守處州經畧
使李國鳳上其功執政以方氏故抑之授總管府判不
與兵事基遂棄官遷青田著郁離子以見志時避方氏
者爭依基基稍為部署寇不敢犯及太祖下金華定括

蒼聞基及宋濂等名以幣聘基未應總制孫炎再致書
固邀之基始出既至陳時務十八策太祖大喜築禮賢
館以處基等寵禮甚至初太祖以韓林兒稱宋後遙奉
之歲首中書省設御座行禮基獨不拜曰牧豎耳奉之
何為因見太祖陳天命所在太祖問征取計基曰士誠
自守虜不足慮友諒劫主脅下名號不正地據上流其
心無日忘我宜先圖之陳氏滅張氏勢孤一舉可定然
後北向中原王業可成也太祖大悅曰先生有至計勿

惜盡言會陳友諒陷太平謀東下勢張甚諸將或議降
或議奔據鍾山基張目不言太祖召入內基奮曰主降
及奔者可斬也太祖曰先生計安出基曰賊驕矣待其
深入伏兵邀取之易耳天道後舉者勝取威制敵以成
王業在此舉矣太祖用其策誘友諒至大破之以克敵
賞賞基基辭友諒兵復陷安慶太祖欲自將討之以問
基基力贊遂出師攻安慶自旦及暮不下基請逕趨江
州擣友諒巢穴遂悉軍西上友諒出不意帥妻子奔武

昌江州降其龍興守將胡美遣子通欵請勿散其部曲
太祖有難色基從後蹋胡牀太祖悟許之美降江西諸
郡皆下基喪母值兵事未敢言至是請還葬會苗軍反
殺金處守將胡大海耿再成等浙東搖動基至衢為守
將夏毅諭安諸屬邑復與平章邵榮等謀復處州亂遂
定國珍素畏基致書唁基答書宣示太祖威德國珍遂
入貢太祖數以書即家訪軍國事基條答悉中機宜尋
赴京太祖方親援安豐基曰漢吳侗隙未可動也不聽

友諒聞之垂問圍洪都太祖曰不聽君言幾失計遂自將救洪都與友諒大戰鄱陽湖一日數十接太祖坐湖牀督戰基侍側忽躍起大呼趣太祖更舟太祖倉卒徙別舸坐未定飛礮擊舊所御舟立碎友諒乘高見之大喜而太祖舟更進漢軍皆失色時湖中相持三日未決基請移軍湖口扼之以金木相犯日決勝友諒走死其後太祖取士誠北伐中原遂成帝業畧如基謀吳元年以基為太史令上戊申大統歷熒惑守心請下詔罪己

大旱請決滯獄即命基平反雨隨注因請立法定制以止濫殺太祖方欲刑人基請其故太祖語之以夢基曰此得土得衆之象宜停刑以待後三日海寧降太祖喜悉以囚付基縱之尋拜御史中丞兼太史令太祖即皇帝位基奏立軍衛法初定處州稅糧視宋制畝加五合惟青田命毋加曰令伯溫鄉里世世為美談也帝幸汴梁基與左丞相善長居守基謂宋元寬縱失天下今宜肅紀綱令御史糾劾無所避宿衛官侍有過者皆啟皇

太子置之法人憚其嚴中書省都事李彬坐貪縱抵罪
善長素暱之請緩其獄基不聽馳奏報可方祈雨即斬
之由是與善長忤帝歸愬基僂人壇下不敬諸怨基
者亦交譖之會以旱求言基奏士卒物故者其妻悉處
別營凡數萬人陰氣鬱結工匠死皆骸暴露吳將吏降
者皆編軍戶足干和氣帝納其言旬日仍不雨帝怒會
基有妻喪遂請告歸時帝方營中都又銳意減庫庫基
瀕行奏曰鳳陽雖帝鄉非建都地王保保未可輕也已

而定西失利庫庫竟走沙漠迄為邊患其冬帝手詔敘
基勲伐名赴京賜賚甚厚追贈基祖父皆永嘉郡公累
欲進基爵基固辭不受初太祖以事責丞相李善長基
言善長勲舊能調和諸將太祖曰是數欲害君君乃為
之地耶吾行相君矣基頓首曰是如易柱須得大木若
束小木為之且立覆及善長罷帝欲相楊憲憲素善基
基力言其不可曰憲有相才無相器夫宰相持心如水
以義理為權衡而已無與者也憲則不然帝問汪廣洋

曰此褊淺殆甚於憲又問胡惟庸曰譬之駕懼其債轅也帝曰吾之相誠無逾先生基曰臣疾惡太甚又不耐繁劇為之且孤上思天下何患無才惟明主悉心求之目前諸人誠未見其可也後憲廣洋惟庸皆敗三年授弘文館學士十一月大封功臣授基開國翊運守正文臣資善大夫上護軍封誠意伯祿二百四十石明年賜歸老於鄉帝嘗手書問天象基條答甚悉而焚其草大要言霜雪之後必有陽春今國威已立宜少濟以寬大

基佐定天下料事如神性剛嫉惡與物多忤至是還隱
山中惟飲酒奕棋口不言功邑令求見不得微服為野
人謁基基方濯足令從子引入茆舍炊黍飯令令告曰
某青田知縣也基驚起稱民謝去終不復見其韜跡如
此然究為惟庸所中初基言甌括間有隙地曰談洋南
抵閩界為鹽盜藪方氏所由亂請設巡檢司守之奸民
弗便也合茗洋逃軍反吏匿不以聞基令長子璉奏其
事不先白中書省胡惟庸方以左丞掌省事挾前憾使

吏訐基謂談洋地有王氣基圖為墓民弗與則請立巡
檢逐民帝雖不罪基然頗為所動遂奪基祿基懼入謝
乃留京不敢歸未幾惟庸相基大感曰使吾言不驗蒼
生福也憂憤疾作八年三月帝親製文賜之遣使護歸
抵家疾篤以天文書授子璉曰亟上之母令後人習也
又謂次子璟曰夫為政寬猛如循環當今之務在修德
省刑祈天永命諸形勝要害之地宜與京師聲勢連絡
我欲為遺表惟庸在無益也惟庸敗後上必思我有所

問以是密奏之居一月而卒年六十五基在京病時惟庸以醫來飲其藥有物積腹中如拳石其後中丞徐節首惟庸逆謀并謂其毒基致死云基虬髯貌修偉慷慨有大節論天下安危義形於色帝察其至誠任以心膺每名基輒屏人密語移時基亦自謂不世遇知無不言遇急難勇氣奮發計畫立定人莫能測暇則敷陳王道帝每恭已以聽常呼為老先生而不名曰吾子房也又曰數以孔子之言導子顧惟惺語秘莫能詳而世所傳

為神奇多陰陽風角之說非其至也所為文章氣昌而
奇與宋濂並為一代之宗所著有覆瓿集犁眉公集傳
於世子璉璉字孟藻有文行洪武十年授考功監丞
試監察御史出為江西叅政太祖常欲大用之為惟庸
黨所脅墮井死璉子廌字士端洪武二十四年三月嗣
伯食祿五百石初基爵止及身至是帝追念基功又憫
基父子皆為惟庸所厄命增其祿予世襲明年坐事貶
秩歸里洪武末坐事戍甘肅尋赦還建文帝及成祖皆

欲用之以奉親守墓力辭永樂間卒子法傳襲景泰三

年命錄基後授法曾孫祿世襲五經博士弘治十三年

以給事中吳士偉言乃命祿孫瑜為處州衛指揮使正

德九年加贈基太師諡文成嘉靖十年刑部郎中李瑜

言基宜侑享高廟封世爵如中山王達下廷臣議僉言

高帝收攬賢豪一時佐命功臣並軌宣猷而惟幄奇謀

中原大計往往屬基故在軍有子房之稱剖符發諸葛

之喻基亡之後孫廌實嗣太祖名諭再三鐵券丹書誓

言世祿廌嗣未幾旋即隕世褫圭裳於未裔委帶礪於空言或謂後嗣孤貧弗克負荷或謂長陵紹統遂至猜嫌雖一尋泥塗傳聞多謬而載書盟府績效具存昔武王興滅天下歸心成季無後君子所歎基宜侑享太廟其九世孫瑜宜嗣伯爵與世襲制曰可瑜卒孫世延嗣嘉靖末南京振武營兵變世延掌右軍都督府事撫定之數上封事不報忿而恣橫萬厯三十四年坐罪論死卒適孫萊臣年幼庶兄蓋臣借襲蓋臣卒萊臣當襲蓋

臣子孔昭復據之崇禎時出督南京操江福王之立與

馬士英阮大鍼比後航海不知所終璟字仲璟基次子

弱冠通諸經太祖念基每歲召璟同章溢子允載葉琛

子永道胡琛子伯機入見便殿燕語如家人洪武二十

三年命襲父爵璟言有長兄子廌在帝大喜命廌襲封

以璟為閣門使且諭之曰考宋制閣門使即儀禮司朕

欲汝日夕左右以宣達為職不特禮儀也帝臨朝出侍

班百官奏事有闕遺者隨時糾正都御史袁泰奏車牛

事失實帝宥之泰忘引謝璟糾之服罪帝因諭璟凡似此者即面糾朕雖不之罪要令知朝廷綱紀已復令同法司錄獄囚寃滯谷王就封擢為左長史璟論說英侃喜談兵初溫州賊葉丁香叛延安侯唐勝宗討之決策於璟破賊還稱璟才畧帝喜曰璟真伯溫兒矣嘗與成祖奕成祖曰卿不少讓耶璟正色曰可讓處則讓不可讓者不敢讓也成祖默然北平兵起璟隨谷王歸京師獻十六策不聽令叅李景隆軍事景隆敗璟夜渡盧溝

河冰裂馬陷冒雪行三十里子猷自大同赴難遇之良鄉與俱歸上聞見錄不省遂歸里成祖即位名璟稱疾不至逮入京猶稱殿下且云殿下百世後逃不得一篡字下獄自經死法官希旨緣坐其家成祖以基故不許宣德二年授貊刑部照磨

宋濂字景濂其先金華之潛溪人至濂乃遷浦江幼英敏強記就學於聞人夢吉通五經復往從吳萊學已遊柳貫黃潛之門兩人皆亟遜濂自謂弗如元至正中薦

授翰林編修以親老辭不行入龍門山著書踰十餘年
太祖取婺州召見濂時已改寧越府命知府王顯宗開
郡學因以濂及葉儀為五經師明年三月以李善長薦
與劉基章溢葉琛並徵至應天除江南儒學提舉命授
太子經尋改起居注濂長基一歲皆起東南負重名基
雄邁有奇氣而濂自命儒者基佐軍中謀議濂亦首用
文學受知恒侍左右備顧問嘗召講春秋左氏傳濂進
曰春秋乃孔子褒善貶惡之書苟能遵行則賞罰適中

天下可定也太祖御端門口釋黃石公三畧濂曰尚書
二典三謨帝王大經大法畢具願留意講明之已論賞
賚復曰得天下以人心為本人心不固雖金帛充牣將
焉用之太祖悉稱善乙巳三月乞歸省太祖與太子並
加勞賜濂上箋謝并奉書太子勉以孝友敬恭進德修
業太祖覽書大悅召太子為語書意賜札褒答并令太
子致書報焉尋丁父憂服除召還洪武二年詔修元史
命充總裁官是年八月史成除翰林院學士明年二月

儒士歐陽佑等採故元元統以後事蹟還朝仍命濂等
續修六越月再成賜金帛是月以失朝叅降編修四年
遷國子司業坐考祀孔子禮不以時奏謫安遠知縣旋
召為禮部主事明年遷贊善大夫是時帝留意文治徵
召四方儒士張唯等數十人擇其年少俊異者皆擢編
修令入禁中文華堂肄業命濂為之師濂傳太子先後
十餘年凡一言動皆以禮法諷勸使歸於道至有闕政
教及前代興亡事必拱手曰當如是不當如彼皇太子

每斂容嘉納言必稱師父云帝剖符封功臣召濂議五等封爵宿大本堂討論達旦厯據漢唐故實量其中而奏之甘露屢降帝問災祥之故對曰受命不於天於其人休符不於祥於其仁春秋書異不書祥為是故也皇從子文正得罪濂曰文正固當死陛下體親親之誼置諸遠地則善矣車駕祀方丘患心不寧濂從容言曰養心莫善於寡欲審能行之則心清而身泰矣帝稱善者良久嘗問以帝王之學何書為要濂舉大學衍義乃命

大書揭之殿兩廡壁頃之御西廡諸大臣皆在帝指行
義中司馬遷論黃老事命濂講析講畢因曰漢武弱方
技謬悠之學改文景恭儉之風民力既敝然後嚴刑督
之人主誠以禮義治心則邪說不入以學校治民則禍
亂不興刑罰非所先也問三代厯數及封疆廣狹既備
陳之復曰三代治天下以仁義故多厯年所又問三代
以上所讀何書對曰上古載籍未立人不專講誦君人
者兼治教之責率以躬行則衆自化嘗奉制詠鷹令七

舉足即成有自古戒禽荒之言帝忻然曰卿可謂善陳
矣濂之隨事納忠皆此類也六年七月遷侍講學士知
制誥同修國史兼贊善大夫命與詹同樂韶鳳修日厯
又與吳伯宗等修寶訓九月定散官資階給濂中順大
夫欲任以政事辭曰臣無他長待罪禁近足矣帝益重
之八年九月從太子及秦晉楚靖江四王講武中都帝
得輿圖濠梁古蹟一卷遣使賜太子題其外令濂詢訪
隨處言之太子以示濂因厯厯舉陳隨事進說甚有規

益濂性誠謹官內庭久未嘗許人過所居室署曰溫樹
客問禁中語即指示之嘗與客飲帝密使人偵視翼曰
問濂昨飲酒否坐客為誰饌何物濂具以實對笑曰誠
然卿不朕欺間召問羣臣臧否濂惟舉其善者曰善者
與臣友臣知之其不善者不能知也主事茹太素上書
萬餘言帝怒問廷臣或指其書曰此不敬此誹謗非法
問濂對曰疲盡忠於陛下耳陛下方開言路惡可深罪
既而帝覽其書有足採者悉召廷臣詰責因呼濂字曰

微景濂幾誤罪言者於是帝廷譽之曰朕聞太上為聖
其次為賢其次為君子宋景濂事朕十九年未嘗有一
言之偽誚一人之短始終無二非止君子抑可謂賢矣
每燕見必設坐命茶每旦必令侍膳往復咨詢常夜分
乃罷濂不能飲帝嘗強之至三觴行不成步帝大懽樂
御製楚辭一章命詞臣賦醉學士詩又嘗調甘露於湯
手酌以飲濂曰此能愈疾延年願與卿共之又詔太子
賜濂良馬復為製良馬歌一章亦命侍臣和焉其寵待

如此九年進學士承旨知制誥兼贊善如故其明年致仕賜御製文集及綺帛問濂年幾何曰六十有八帝乃曰藏此綺三十二年作百歲衣可也濂頓首謝又明年來朝十三年長孫慎坐胡惟庸黨帝欲置濂死皇后太子力救乃安置茂州濂狀貌豐偉美鬚髯視近而明一黍上能作數字自少至老未嘗一日去書卷於學無所不通為文醇深演迤與古作者並在朝郊社宗廟山川百神之典朝會宴享律厯衣冠之制四裔貢賦賞勞之

儀旁及元勲巨卿碑記刻石之辭咸以委濂屢推為開國文臣之首士大夫造門乞文者後先相踵外國貢使亦知其名數問宋先生起居無恙否高麗安南日本至出兼金購文集四方學者悉稱為太史公不以姓氏雖白首侍從其勲業爵位不逮基而一代禮樂制作濂所裁定者居多其明年卒於夔年七十二知事葉以從葬之蓮花山下蜀獻王慕濂名復移瑩華陽城東弘治九年四川巡撫馬俊奏濂真儒翊運述作可師黼黻多功

輔導著績久死遠戍幽壤沉淪乞加卹錄下禮部議復
其官春秋祭墓所正德中追諡文憲仲子璲最知名字
伯珩善詩尤工書法洪武九年以濂故名為中書舍人
其兄子慎亦為儀禮序班帝數試璲與慎并教誡之笑
語濂曰卿為朕教太子諸王朕亦教卿子孫矣濂行步
艱帝必命璲慎扶掖之祖孫父子共官內庭衆以為榮
慎坐罪璲亦連坐並死家屬悉徙茂州建文帝即位追
念濂興宗舊學召璲子懌官翰林永樂十年濂孫坐姦

黨鄭公智外親詔特宥之

葉琛字景淵麗水人博學有才藻元末從舒穆魯伊遜
守處州為畫策捕誅山寇授行省元帥王師下處州琛
避建寧以薦徵至應天授營田司僉事尋遷洪都知府
佐鄧愈鎮守祝宗康泰叛愈脫走琛被執不屈大罵死
之追封南陽郡侯塑像耿再成祠後祀功臣廟

章溢字三益龍泉人始生聲如鐘弱冠與胡深同師王
毅毅字叔剛許謙門人也教授鄉里講解經義聞者多

感悟溢從之遊同志聖賢學天性孝友嘗遊金華元憲
使圖卜戢布哈禮之改官秦中要與俱至虎林心動辭
歸歸八日而父歿未葬火焚其廬溢搏額籲天火至柩
所而滅斬黃寇犯龍泉溢從子存仁被執溢挺身告賊
曰吾兄止一子寧我代賊素聞其名欲降之縛於柱溢
不為屈至夜紿守者脫歸集里民為義兵擊破賊俄府
官以兵來欲盡誅誅誤者溢走說舒穆魯伊遜曰貧民
迫凍餒誅之何為伊遜然之檄止兵留溢幕下從平慶

元浦城盜授龍泉主簿不受歸伊遜守台州為賊所圍
溢以鄉兵赴援却賊已而賊陷龍泉監縣布古坦遁去
溢與其師王毅帥壯士擊走賊布古坦還內慚殺毅以
反溢時在伊遜幕府聞之馳歸偕胡深執戮首惡因引
兵平松陽麗水諸寇長槍軍攻婺聞溢兵至解去論功
累授浙東都元帥府僉事溢曰吾所將皆鄉里子弟肝
腦塗地而吾獨取功名弗忍也辭不受以義兵屬其子
存道退隱匡山明兵克處州避入閩太祖聘之與劉基

葉琛宋濂同至應天太祖勞基等曰我為天下屈四先生今天下紛紛何時定乎濂對曰天道無常惟德是輔惟不嗜殺人者能一之耳太祖踐其言乃授僉營田事巡行江東兩淮田分籍定稅民甚便之以病久在告太祖知其念母也厚賜遣歸省而留其子存厚於京師浙東設提刑按察使命濂為僉事胡深出師溫州令濂守處州饋餉供億民不知勞山賊來寇敗走之遷湖廣按察僉事時荆襄初平多廢地議分兵屯田且以控制北

方從之會河南浙東按察使宋思顏孔克仁等以事被逮詞連溢太祖遣太史令劉基諭曰素知溢守法毋疑也會胡深入閩陷沒處州動搖命溢為浙東按察副使往鎮之溢以獲罪蒙宥不應遷秩辭副使仍為僉事既至宣布詔旨誅首叛者餘黨悉定召舊部義兵分布要害賊寇慶元龍泉溢列木柵為屯賊不敢犯浦城戍卒乏食李文忠欲運處州糧餉之溢以舟車不通而軍中所掠糧多請入官均給之食遂足溫州茗洋賊為患溢

命子存道捕斬之朱亮祖取温州軍中頗掠子女溢悉
籍還其家吳平詔存道守處而召溢入朝太祖諭羣臣
曰溢雖儒臣父子宣力一方寇盜盡平功不在諸將後
復問溢征閩諸將如何對曰湯和由海道胡美由江西
必勝然閩中尤服李文忠威信若令文忠從浦城取建
寧此萬全計也太祖立詔文忠出師如溢策處州糧舊
額一萬三千石軍興加至十倍溢言之丞相奏復其舊
浙東造海舶徵巨材於處溢曰處婺之交山巖峻險縱

有木從何道出白行省罷之洪武元年與劉基並拜御史中丞兼贊善大夫時廷臣伺帝意多嚴苛溢獨持大體或以為言溢曰憲臺百司儀表當養人廉恥豈恃搏擊為能哉帝親祀社稷會大風雨還坐外朝怒儀禮不合致天變溢委曲明其無罪乃貰之文忠之征閩也存道以所部鄉兵萬五千人從閩平詔存道以所部從海道北征溢持不可曰鄉兵皆農民許以事平歸農今復調之是不信也帝不懌既而奏曰兵已入閩者俾還鄉

里昔嘗叛逆之民宜籍為軍使北上一舉而恩威著矣
帝喜曰孰謂儒者迂濶哉然非先生一行無能辦者溢
行至處州遭母喪乞守制不許鄉兵既集命存道由永
嘉浮海而北再上章乞終制詔可溢悲感過度營葬親
負土石感疾卒年六十五帝痛悼親撰文即其家祭之
存道溢長子溢應太祖聘存道帥義兵歸總管孫炎炎
令守上游屢却陳友定兵及以功授處州翼元帥副使
戍浦城總制胡深死命代領其衆為遊擊溢即處州坐

鎮之溢謂父子相統於律不宜奏罷存道官不允旋分
兵征閩而詔存道守處復部鄉兵從李文忠入閩及還
浮海至京師帝褒諭之命從馮勝北征積功授處州衛
指揮副使洪武三年從徐達西征留守興元敗蜀將吳
友仁再守平陽轉左衛指揮同知五年從湯和出塞征
陽和遇敵於斷頭山力戰死焉

贊曰太祖既下集慶所至收攬豪雋徵聘名賢一時韜
光韞德之士幡然就道若四先生者尤為傑出基濂學

術醇深文章古茂同為一代宗工而基則運籌帷幄
則從容輔導於開國之初敷陳王道忠誠恪慎卓哉佐
命臣也至溢之宣力封疆殫之致命遂志宏才大節建
豎偉然洵不負弓旌之德意矣基以儒者有用之學輔
翊治平而好事者多以識緯術數妄為傳會其語近誕
非深知基者故不錄云

明史卷一百二十八

欽定四庫全書

明史卷一百二十八考證

經畧使李國鳳上其功執政以方氏故抑之

臣嚴福

按開國臣傳及明書均稱經歷使李國鳳右方氏僅以儒學資遷基為總管府判奪其兵權明功臣封爵考亦云李國鳳奏授基為處州總管府判史獨言執政抑之似非李國鳳意者考今獻備遺及黃伯生撰基行狀亦與史同或當時李國鳳承執政指為之遂

以為出於執政耶謹識

基獨不拜曰牧豎耳奉之何為

臣嚴福按沈夢熊明

相業軍功考云諸將議於中書省升御座奉韓林兒
行慶賀禮基從後踢上所坐胡床上悟乃止不載基
倡言事與史文異謹附識

其龍興守將胡美遣子通欵

臣嚴福按胡美遣鄭仁

傑請降見於本傳考獻徵錄今獻備遺明相業軍功
考均與本傳同史獨言遣子通欵未知何據謹識

基喪母值兵事未敢言至是請還葬

臣嚴福按基聞

母喪一事明功臣封爵考開國臣傳及明書均書基告歸上固留不得行至是始歸其說較史之未敢言者為長謹識

國珍素畏基致書唁基答書宣示太祖盛德國珍遂入貢

臣嚴福按方國珍致書唁基開國臣傳明功臣

封爵考今獻備遺獻徵錄明書均稱國珍致書加幣

基白於上上使受而答之因騰書宣示方氏遂入貢

史不載白之上。一節似基自作書答之者。非人臣不外交義也。謹附識。

時湖中相持三日未決。

臣

嚴福按明兵與漢軍相持

三日未決。明相業軍功考作相持五晝夜。與史文不同。豈見聞固異耶。謹識。

初定處州稅糧。視宋制畝加五合。惟青田命毋加。

臣

嚴福按章溢奏定處州稅額考。獻徵錄明功臣封爵考。今獻備遺名臣言行錄。均云比宋畝加五合。惟青

田止科五合雖似與史文小異大意謂宋時每畝止科五合今則加之惟青田仍舊耳謹識

數上封事不報忿而恣橫萬厯三十四年坐罪論死

臣嚴福按劉世延坐罪論死史不詳致罪之由考開國臣傳稱延以封事見格而怒因縱其下奪民田詔勒回籍不肯聽至萬厯丙午下南京刑部獄死蓋其縱恣取之也謹識

谷王就封擢為左長史

臣嚴福按璟為谷府長史開

國臣傳書曰右史書左階級微有不同考明功臣封爵考則祇書長史而不詳左右之分無憑核定謹識
闕疑

宣德二年授貺刑部照磨

臣

嚴福按貺授刑部照磨

開國臣傳作宣德三年史作二年考明功臣封爵考祇紀官階不詳年代無憑改定謹識闕疑

宋濂傳入龍門山著書踰十餘年

臣

嚴福按浙江通

志義烏縣祇有龍門山無小龍門山考名臣言行錄

今獻備遺諸書均與史同惟開國臣傳明書及王禕
所撰漁傳獨云小龍門山而於傳後贊內則又稱為
龍門山蓋當時各以意名之故即禕一人所撰之文
亦不免前後互異耳謹識

嘗召講春秋左氏 至乙巳三月乞歸省 臣嚴福按

明書云洪武壬寅召漁講春秋是年歸省甲辰進講
尚書又明年以疾還家開國臣傳亦同是歸省在進
講尚書之前不在乙巳年又祇補書歸省而不紀疾

歸紀載訛誤謹識

弘治九年四川巡撫馬俊奏瀟至乞加卹錄

臣嚴福

按開國臣傳云弘治五年四川巡撫邢表奏乞加瀟
謚九年巡撫賈俊又言明書所載亦同而史不載邢
表疏又訛賈俊為馬俊係載筆之訛但考俊傳亦載
此事無憑改定謹考訂而仍其舊

葉琛傳王師下處州琛避建寧以薦徵至應天

臣嚴

福按葉琛應聘明書云明兵下處州琛謂其下曰金

陵必成大事遂來降嗣因孫炎招致胡大海送逮康
遂同劉基等入見不言走建寧也史以為先避而後
應聘或別有所據耶謹識

積功授處州衛指揮副使

臣嚴福按職官志指揮副

使秩正四品指揮同知秩從三品存道之授處州衛
也開國臣傳明書均作同知惟名世類苑獻徵錄作
副使與史同但下以轉左衛指揮同知之文觀之祇
以轉言是同階而轉耳非越級也史言副使或有誤

謹識



明史卷一百二十八考證



總校官編修臣吳紹濬

欽定四庫全書薈要

史部

明史卷一百二十九

三十



詳校官員外郎臣楊世綸

欽定四庫全書薈要卷六千七百二十二

史部

明史卷一百二十九

大學士張廷玉等奉 敕修

傳第十七

馮勝

兄國用

傅友德

廖永忠

趙庸

楊璟

胡美

馮勝定遠人初名國勝又名宗異最後名勝生時黑氣



滿室經日不散及長雄勇多智畧與兄國用俱喜讀書
通兵法元末結寨自保太祖畧地至妙山國用偕勝來
歸甚見親信太祖嘗從容詢天下大計國用對曰金陵
龍蟠虎踞帝王之都先拔之以為根本然後四出征伐
倡仁義收人心勿貪子女玉帛天下不足定也太祖大
悅俾居幕府從克滁和戰三义河板門寨雞籠山皆有
功從渡江取太平遂命國用典親兵委以心腹太祖既
禽陳額森釋之令招其部曲國用策其必叛不如弗遣

尋果叛為其下所殺其從子兆先復擁衆屯方山曼濟
哈雅扼采石國用與諸將攻破哈雅水寨又破禽兆先
盡降其衆三萬餘人衆疑懼太祖擇驍勇者五百人為
親軍宿衛帳中悉屏舊人獨留國用侍榻側五百人者
始安即命國用將之以攻集慶爭效死先登與諸將下
鎮江丹陽寧國泰興宜興從征金華攻紹興累擢親軍
都指揮使卒於軍年三十六太祖哭之慟洪武三年追
封郢國公肖像功臣廟位第八國用之卒子誠幼勝先

已積功為元帥遂命襲兄職典親軍陳友諒逼龍灣太祖禦之戰石灰山勝攻其中堅大破之又追破之采石遂復太平從征友諒破安慶水寨長驅至江州走友諒進親軍都護從解安豐圍遷同知樞密院事從戰鄱陽下武昌克廬州移兵取江西諸路與諸將收淮東克海安壩取泰州徐達圍高郵未下還師援宜興以勝督軍高郵守將詐降勝令指揮康泰帥數百人先入城敵閉門盡殺之太祖怒召勝決大杖十令步詣高郵勝慚憤

攻其力達亦自宜興還益兵攻克之遂取淮安安豐破禽吳將呂珍於舊館下湖州克平江功次平章常遇春再遷右都督從大將軍達北征下山東諸州郡洪武元年兼太子右詹事坐小法貶一官為都督同知引兵朔河取汴洛下陝州趨潼關守將宵遁遂奪關取華州還汴謁帝行在授征虜右副將軍留守汴梁尋從大將軍征山西由武陟取懷慶踰太行克碗子城取澤潞禽元石丞賈成於猗氏克平陽絳州禽元左丞田保保等獲

將士五百餘人帝悅詔右副將軍勝居常遇春下偏將
軍湯和居勝下偏將軍楊璟居和下二年渡河趨陝西
克鳳翔遂渡隴取鞏昌進逼臨洮降李思齊還從大將
軍圍慶陽庫庫遣將攻原州為慶陽聲援勝扼驛馬關
敗其將遂克慶陽執張良臣陝西悉平九月帝召大將
軍還命勝駐慶陽節制諸軍勝以關陝既定輒引兵還
帝怒切責之念其功大赦勿治而賞賚金幣不能半大
將軍明年正月復以右副將軍同大將軍出西安擣定

西破庫庫特穆爾獲士馬數萬分兵自徽州南出一百
八渡徇畧陽禽元平章蔡琳遂入沔州遣別將自連雲
棧取興元移兵土番征哨極於西北凱旋論功授開國
輔運推誠宣力武臣特進榮祿大夫右柱國同叅軍國
事封宋國公食祿三千石予世券誥詞謂勝兄弟親同
骨肉十餘年間除肘腋之患建爪牙之功平定中原佐
成混一所以稱揚之者甚至五年以勝宣力四方與魏
國公達曹國公文忠各賜彤弓庫庫在和林數擾邊帝

患之大發兵三道出塞命勝為征西將軍帥副將軍陳德傅友德等出西道取甘肅至蘭州友德以驍騎前驅再敗元兵勝復敗之索琳山至甘肅元將上都羅迎降至額齊訥路守將布延特穆爾亦降次畢道山岐王多爾濟巴勒遁去追獲其平章昌嘉努等二十七人馬駝牛羊十餘萬是役也大將軍達軍不利左副將軍文忠殺傷相當獨勝斬獲甚衆全師而還會有言其私匿駝馬者賞不行自後數出練兵臨清北平出大同征元遺

衆鎮陝西及河南冊其女為周王妃久之大將軍達左
副將軍文忠皆卒而元太尉納克楚擁衆數十萬屯金
山數為遼東邊害二十年命勝為征虜大將軍額國公
傅友德永昌侯藍玉為左右副將軍帥南雄侯趙庸等
以步騎二十萬征之鄭國公常茂曹國公李景隆申國
公鄧鎮等皆從帝復遣故所獲納克楚部將孛喇古者
奉璽書往諭降勝出松亭關分築大寧寬河會州富峪
四城駐大寧踰兩月留兵五萬守之而以全師壓金山

納克楚見鼐喇古驚曰爾尚存乎鼐喇古述帝恩德納克楚喜遣其左丞特默齊等獻馬且覘勝軍勝已深入踰金山至女直魁吞降納克楚之將慶國公古通大軍奄至納克楚度不敵因鼐喇古請降勝使藍玉輕騎受之玉飲納克楚酒歡甚解衣衣之納克楚不肯服顧左右咄咄語謀遁去勝之壻常茂在坐遽起砍其臂都督耿忠擁以見勝納克楚將士妻子十餘萬屯松花河聞納克楚傷驚潰勝遣古通諭之乃降得所部二十餘萬

人牛羊馬駝輜重亘百餘里還至伊瑪河復收其殘卒
二萬餘車馬五萬而都督濮英殿後為敵所殺師還以
捷聞並奏常茂激變狀盡將降衆二十萬人入關帝大
悅使使者迎勞勝等械繫茂會有言勝多匿良馬使闇
者行酒於納克楚之妻求大珠異寶王子死二日強娶
其女失降附心又失濮英三千騎而茂亦訐勝過帝怒
收勝大將軍印命就第鳳陽奉朝請諸將士亦無賞勝
自是不復將大兵矣二十一年奉詔調東昌番兵征曲

靖番兵中道叛勝鎮永寧撫安之二十五年命籍太原
平陽民為軍立衛屯田皇太孫立加太子太師偕頴國
公友德練軍山西河南諸公侯皆聽節制時詔列勲臣
望重者八人勝居第三太祖春秋高多猜忌勝功最多
數以細故失帝意藍玉誅之月召還京踰二年賜死諸
子皆不得嗣而國用子誠積戰功雲南累官至右軍左
都督納克楚者元穆呼里裔孫為太平路萬戶太祖克
太平被執以名臣後待之厚知其不忘元資遣北歸元

既亡納克楚聚兵金山畜牧蕃盛帝遣使招諭之終不
報數犯遼東為葉旺所敗勝等大兵臨之乃降封海西
侯從傳友德征雲南道卒子察罕改封藩陽侯坐藍玉
黨死

傳友德其先宿州人後徙碭山元末從劉福通黨李喜
喜入蜀喜喜敗從明玉珍玉珍不能用走武昌從陳友
諒無所知名太祖攻江州至小孤山友德帥所部降帝
與語奇之用為將從常遇春援安豐畧廬州還從戰鄱

陽湖輕舟挫友諒前鋒被數創戰益力復與諸將邀擊於涇江口友諒敗死從征武昌城東南高冠山下瞰城中漢兵據之諸將相顧莫前友德帥數百人一鼓奪之流矢中頰洞脅不為沮武昌平授雄武衛指揮使從徐達拔廬州別將克彛陵衡州襄陽攻安陸被九創破禽其將任亮從大軍下淮東破張士誠援兵於馬邏港獲戰艘千復大破元將珠占於安豐同陸聚守徐州庫庫遣將李二來攻次陵子村友德度兵寡不敵遂堅壁不

戰訶其衆方散掠以二千人沂河至呂梁登陸擊之單
騎奮梁刺其將韓乙敵敗去度且復至亟還開城門而
陣於野卧戈以待約聞鼓即起李二果至鳴鼓士騰躍
搏戰破禽二名還進江淮行省叅知政事撤御前麾蓋
鼓吹送歸第明年從大將軍北征破沂州下青州元丞
相伊蘇來援以輕騎誘敵入伏奮擊敗走之遂取萊陽
東昌明年從定汴洛收諸山寨渡河取衛輝彰德至臨
清獲元將為嚮導取德州滄州既克元都偵邏古北隘

口守盧溝橋畧大同還下保定真定守定州從攻山西
克太原庫庫自保安來援萬騎突至友德以五十騎衝
却之因夜襲其營庫庫倉卒遁去追至土門關獲其士
馬萬計復敗賀宗哲於石州敗圖魯卜於宣府遂西會
大將軍圍慶陽以偏師駐靈州遏其援兵遂克慶陽還
賜白金文綺洪武三年從大將軍擣定西大破庫庫移
兵伐蜀領前鋒出一百八渡奪畧陽關遂入沔分兵自
連雲棧合攻漢中克之以饋餉不繼還軍西安蜀將吳

友仁寇漢中友德以三千騎救之攻斗山寨令軍中人
燃十炬布山上蜀兵驚遁是冬論功授開國輔運推誠
宣力武臣榮祿大夫柱國同知大都督府事封潁川侯
食祿千五百石予世券明年克征虜前將軍與征西將
軍湯和分道伐蜀和帥廖永忠等以舟師攻瞿塘友德
帥顧時等以步騎出秦隴太祖諭友德曰蜀人聞我西
伐必悉精銳東守瞿塘北阻金牛以抗我師若出不意
直擣階文門戶既隳腹心自潰兵貴神速患不勇耳友

德疾馳至陝集諸軍聲言出金牛而潛引兵趨陳倉攀

援巖谷晝夜行抵階州敗蜀將丁世珍克其城蜀人斷

白龍江橋友德修橋以渡破五里關遂拔文州渡白水

江趨綿州時漢江水漲不得渡伐木造戰艦欲以軍聲

通瞿塘乃削木為牌數千書克階文綿日月投漢水順

流下蜀守者見之皆解體初蜀人聞大軍西征其丞相

戴壽等悉衆守瞿塘及聞友德破階文擣江油始分兵

援漢州以保成都未至友德已破其守將向大亨於城

下謂將士曰援師遠來聞大亨破已膽落無能為也迎擊大敗之遂拔漢州進圍成都壽等以象戰友德令強弩火器衝之身中流矢不退將士殊死戰象反走躡藉死者甚衆壽等聞其主明昇已降乃籍府庫倉廩面縛詣軍門成都平分兵徇州邑未下者克保寧執吳友仁送京師蜀地悉定友德之攻漢州也湯和尚頓軍大溪口既於江流得木牌乃進師而戴壽等撤其精兵西救漢州留老弱守瞿塘故永忠等得乘勝擣重慶降明昇

於是太祖製平西蜀文盛稱友德功第一廖永忠次之
師還受上賞五年副征西將軍馮勝征沙漠敗實喇罕
於西涼至永昌敗太尉多爾濟巴勒獲馬牛羊十餘萬
畧甘肅射殺平章布哈降太尉索諾爾等至瓜沙州獲
金銀印及雜畜二萬而還是時師出三道獨友德全勝
以主將勝坐小法賞不行明年復出雁門為前鋒獲平
章鄧博囉特穆爾還鎮北平陳便宜五事皆從之召還
從太子講武於荆山益歲祿千石九年破禽巴延特穆

爾於延安降其衆帝將征雲南命友德巡行川蜀雅播之境修城郭繕關梁因兵威降金筑普定諸山寨十四年副大將軍達出塞討鼐爾布哈渡北黃河襲灰山斬獲甚衆其年秋克征南將軍帥左副將軍藍玉右副將軍沐英將步騎三十萬征雲南至湖廣分遣都督胡海等將兵五萬由永寧趨烏撒而自帥大軍由辰沅趨貴州克普定普安降諸苗蠻進攻曲靖大戰白石江禽元平章達爾瑪遂擊烏撒循格孤山而南以通永寧之兵

遣兩將軍趨雲南元梁王走死友德城烏撒羣蠻來爭奮擊破之得七星關以通畢節又克可渡河降東川烏蒙芒部諸蠻烏撒諸蠻復叛討之斬首三萬餘級獲牛馬十餘萬水西諸部皆降十七年論功進封穎國公食祿三千石予世券十九年帥師討平雲南蠻二十年副大將軍馮勝征納克楚於金山二十一年東川蠻叛復為征南將軍帥師討平之移兵討越州叛酋阿資明年破之於普安二十三年從晉王燕王征沙漠禽鼎爾布

哈還駐開平復征寧夏明年為征虜將軍備邊北平復
從燕王征哈扎爾實喇追元遼王甫行遽令退軍敵不
設備因潛師深入至黑嶺大破敵衆而還再出練兵山
陝總屯田事加太子太師尋遣還鄉友德暗啞跳盪身
冒百死自偏裨至大將每戰必先士卒雖被創戰益力
以故所至立功帝屢敕獎勞子忠尚壽春公主女為晉
世子濟熺妃二十五年友德請懷遠田千畝帝不悅曰
祿賜不薄矣復侵民利何居爾不聞公儀休事耶尋副

宋國公勝分行山西屯田於大同東勝立十六衛是冬再練軍山西河南明年偕召還又明年賜死以公主故錄其孫彥名為金吾衛千戶弘治中晉王為友德五世孫瑛援六王例求襲封下禮官議不許嘉靖元年雲南巡撫都御史何孟春請立祠祀友德詔可名曰報功

廖永忠巢人楚國公永安弟也從永安迎太祖於巢湖年最少太祖曰汝亦欲富貴乎永忠曰獲事明主掃除寇亂垂名竹帛是所願耳太祖嘉焉副永安將水軍渡

江拔采石太平禽陳額森破曼濟哈雅及陳兆先定集
慶克鎮江常州池州討江陰海寇皆有功永安陷於吳
以永忠襲兄職為樞密僉院總其軍攻趙普勝柵江營
復池州陳友諒犯龍江大呼突陣諸軍從其後大敗之
從伐友諒至安慶破其水寨遂克安慶從攻江州州城
臨江守備甚固永忠度城高下造橋於船尾名曰天橋
以船乘風倒行橋傳於城遂克之進中書省右丞從下
南昌援安豐戰鄱陽湖決圍殊死戰敵將張定邊直犯

太祖舟常遇春射走之永忠乘飛舸追且射定邊被百餘矢漢卒多死傷明日復與俞通海等以七舟載葦荻乘風縱火焚敵樓船數百又以六舟深入搏戰復旋繞而出敵驚為神又邀擊之涇江口友諒死從征陳理分兵柵四門於江中連舟為長寨絕其出入理降還京太祖以漆牌書功超羣將智邁雄師八字賜之懸於門已從徐達取淮東張士誠遣舟師薄海安太祖令永忠還兵水寨禦之達遂克淮東諸郡從伐士誠取德清進克

平江拜中書平章政事尋充征南副將軍帥舟師自海道會湯和討降方國珍進克福州洪武元年兼同知詹事院事畧定閩中諸郡至延平破執陳友定尋拜征南將軍以朱亮祖為副由海道取廣東永忠先發書諭元左丞何真曉譬利害真即奉表請降至東莞真帥官屬出迎至廣州降盧左丞禽海寇邵宗愚數其殘暴斬之廣人大悅馳諭九真日南朱厓儋耳三十餘城皆納印請吏進取廣西至梧州降元達嚕噶齊拜哲潯柳諸路

皆下遣亮祖會楊璟收未下州郡永忠引兵克南寧降
象州兩廣悉平永忠善撫綏民懷其惠為之立祠明年
九月還京師帝命太子帥百官迎勞於龍江入見仍命
太子送還第復出撫定泉漳三年從大將軍徐達北征
克察罕諾爾還封德慶侯食祿一千五百石子世券明
年以征西副將軍從湯和帥舟師伐蜀和駐大溪口永
忠先發及舊夔府破守將鄒興等兵進至瞿塘關山峻
水急蜀人設鐵鎖橋橫據關口舟不得進永忠密遣數

百人持糗糧水筒舁小舟踰山渡關出其上流蜀山多
草木令將士皆衣青蓑衣魚貫走崖石間度已至帥精
銳出墨葉渡夜五鼓分兩軍攻其水陸寨水軍皆以鐵
裹船頭置大器而前黎明蜀人始覺盡銳來拒永忠已
破其陸寨會將士舁舟出江者一時並發上下夾攻大
破之鄒興死遂焚三橋斷橫江鎖索禽同僉蔣達等八
十餘人飛天張鐵頭張等皆遁去遂入夔府明日和始
至乃與和分道進期會於重慶永忠帥舟師直擣重慶

次銅鑼峽蜀主明昇請降永忠以和未至辭俟和至乃受降承制撫慰下令禁侵掠卒取民七茹立斬之慰安戴壽向大亨等家令其子弟持書往成都招諭壽等已為傅友德所敗及得書遂降蜀地悉平帝製平蜀文旌其功有傳一廖二之語褒賚甚厚明年北征至和林六年督舟師出海捕倭尋還京初韓林兒在滁州太祖遣永忠迎歸應天至瓜步覆其舟死帝以咎永忠及大封功臣諭諸將曰永忠戰鄱陽時忘軀拒敵可謂奇男子

然使所善儒生窺朕意微封爵故止封侯而不公及楊
憲為相永忠與相比憲誅永忠以功大得免八年三月
坐僭用龍鳳諸不法事賜死年五十三子權十三年嗣
侯從傳友德征雲南守畢節及瀘州召還十七年卒子
鏞不得嗣以嫡子為散騎舍人累官都督建文時與議
兵事宿衛殿廷與弟銘皆嘗受學於方孝孺孝孺死鏞
銘收其遺骸葬聚寶門外山上甫畢亦見收論死弟鉞
及從父指揮僉事昇俱戍邊初廖永忠等之歸太祖也

趙庸兄弟亦俱降後亦有過不得封公與永忠類庸廬
州人與兄仲中聚衆結水寨屯巢湖歸太祖仲中累功
為行樞密院僉事守安慶陳友諒陷安慶仲中棄城走
還龍江法當誅常遇春請原之太祖不許曰法不行無
以懲後遂誅仲中而以其官授庸從復安慶徇江西諸
路進叅知政事從戰康郎山與俞通海廖永忠等以六
舟深入敗敵平武昌克廬州援安豐皆有功大軍取淮
東庸與華高帥舟師克海安泰州進圍平江吳平擢中

書左丞從大將軍取山東洪武元年命兼太子副詹事
河南平命庸留守復分兵渡河徇下河北州縣進克河
間守之尋移守保定并收未復山寨又從大軍克太原
下關陝從常遇春北追元帝師還遇春卒命庸為副將
軍同李文忠攻慶陽行至太原元兵攻大同急文忠與
庸謀以便宜援大同再敗元兵於馬邑禽其將圖魯卜
論功賞賚亞於大將軍三年復從文忠北伐出野狐嶺
克應昌師還論功最以在應昌私納奴婢不得封公封

南雄侯食祿一千五百石予世券已從伐蜀中途還十
四年閩粵盜起命庸討之踰年悉平諸盜及陽山歸善
叛蠻戮其魁散遣餘衆民得復業秦籍蠶戶萬人為水
軍又平廣東盜號鏟平王者獲賊黨萬七千八百餘人
斬首八千八百餘級降其民萬三千餘戶還賜綵幣上
尊良馬其冬出理山西軍務巡撫北邊二十年以左叅
將從傅友德討納克楚二十三年以左副將軍從燕王
出古北口降孛爾布哈還坐胡惟庸黨死爵除

楊璟合肥人本儒家子以管軍萬戶從太祖下集慶進
總管下常州進親軍副都指揮使從下婺州遷樞密院
判官再從伐漢以功擢湖廣行省叅政移鎮江陵進攻
湖南蠻寇駐師三江口復以招討功遷行省平章政事
帥左丞周德興叅政張彬將武昌諸衛軍取廣西洪武
元年春進攻永州守將鄧祖勝迎戰敗斂兵固守璟進
圍之元兵來援駐東鄉倚湘水列七營軍勢甚盛璟擊
敗之俘千餘人全州守將平章阿爾薩蘭及周文貴再

以兵來援輒遣德興擊敗之遣千戶王廷取寶慶德興
彬取全州畧定道州藍山桂陽武岡諸州縣而永州久
不下令裨將分營諸門築壘困之造浮橋西江上急攻
之祖勝力盡仰藥死百戶夏昇約降璟兵踰城入叅政
張子賢巷戰軍潰被執遂克永州而征南將軍廖永忠
叅政朱亮祖亦自廣東取梧州定潯貴鬱林亮祖以兵
來會進攻靖江不下璟謂諸將曰彼所恃西濠水耳決
其隄岸破之必矣乃遣指揮邱廣攻牯口關殺守隄兵

盡決濠水築土隄五道傳於城城中猶固守急攻二月克之元執平章額爾吉訥先是張彬攻南關為守城者所詬怒欲屠其民璟甫入立下令禁止之民乃安復移師徇郴州降兩江土官黃英岑伯顏等而永忠亦定南寧象州廣西悉平還與偏將軍湯和從徐達取山西至澤州及元平章哈扎噶爾戰於韓店敗績還捕唐州亂卒留鎮南陽未幾詔璟往使於夏時夏主昇幼母彭及諸大臣用事璟既至數諭昇以禍福俾從入覲昇集其

下共議而諸大臣方專恣不利昇歸朝皆持不可昇亦
莫能決璟還再以書諭昇終不聽踰二年而夏亡璟遷
湖廣行省平章慈利土官覃垕構諸洞蠻為亂命帥師
往討連敗之垕詐降璟使部卒往報為所執太祖遣使
讓璟璟督戰士力攻賊乃遁三年大封功臣封璟營陽
侯祿千五百石予世券四年從湯和伐蜀戰於瞿塘不
利明年充副將軍從鄧愈討定辰沅蠻寇再從大將軍
徐達鎮北平練兵遼東十五年八月卒追封芮國公諡

武信子通嗣二十年帥降軍戍雲南多道亡降普定指
揮使二十三年詔書坐璟胡惟庸黨謂以瞿塘之敗被
責有異謀云

胡美沔陽人初名廷瑞避太祖字易名美初仕陳友諒
為江西行省丞相守龍興太祖既下江州遣使招諭美
美遣使鄭仁傑詣九江請降且請無散部曲太祖初難
之劉基蹴所坐胡牀太祖悟賜書報曰鄭仁傑至言足
下有効順之誠此足下明達也又恐分散所部此足下

過慮也吾起兵十年奇才英士得之四方多矣有能審
天時料事機不待交兵挺然委身來者嘗推赤心以待
隨其才任使之兵少則益之以兵位卑則隆之以爵財
乏則厚之以賞安肯散其部曲使人自危疑負來歸之
心哉且以陳氏諸將觀之如趙普勝驍勇善戰以疑見
僂猜忌若此竟何所成近建康龍灣之役予所獲長張
梁鉉彭指揮諸人用之如故視吾諸將恩均義一長張
破安慶水寨梁鉉等攻江北並膺厚賞此數人者其自

視無復生理尚待之如此況如足下不勞一卒以完城
來歸者耶得失之機間不容髮足下當早為計美得書
乃遣康泰至九江來降太祖遂如龍興至樵舍美以陳
氏所授丞相印及軍民糧儲之數來獻迎謁於新城門
太祖慰勞之俾仍舊官美之降也同僉康泰平章祝宗
不欲從美微言於太祖太祖命將其兵從徐達征武昌
二人果叛攻陷洪都達等還兵擊定之祝宗走死執康
泰歸於建康太祖以泰為美甥赦勿誅美從征武昌復

與達等帥馬步舟師取淮東進伐張士誠下湖州圍平江別將取無錫降莫天佑師還加榮祿大夫其冬命為征南將軍帥師由江西取福建諭之曰汝以陳氏丞相來歸事吾數年忠實無過故命汝總兵取閩左丞何文輝為爾副叅政戴德聽調發二人雖皆吾親近勿以其故廢軍法聞汝嘗攻閩中宜深知其地利險易今總大軍攻圍城邑必擇便宜可否為進退無失機宜美遂渡杉關下光澤邵武守將李宗茂以城降次建陽守將曹

復疇亦降進圍建寧守將同僉達爾瑪參政陳子琦謀
堅守以老我師美數挑戰不出急攻之乃降整軍入城
秋毫無所犯執子琦等送京師獲將士九千七百餘人
糧糗馬畜稱是會湯和等亦取福州延平興化美遂遣
降將諭降汀泉諸郡福建悉平美留守其地尋召還從
幸汴梁太祖即位以美為中書平章同知詹事院事洪
武三年命赴河南招集庫庫故部曲是年冬論功封豫
章侯食祿千五百石予世券誥詞以竇融歸漢為比十

三年改封臨川侯董建潭府於長沙太祖榜列勲臣謂
持兵兩雄間可觀望而不觀望來歸者七人七人者韓
政曹良臣楊璟陸聚梅思祖黃彬及美皆封侯美與璟
有方面勲帝遇之尤厚十七年坐法死二十三年李善
長敗帝手詔條列奸黨言美因長女為貴妃偕其子壻
入亂宮禁事覺子壻刑死美賜自盡云

贊曰馮勝傅友德百戰驍將也考當日功臣位次與太
祖褒美之詞豈在湯和鄧愈下哉廖永忠智勇超邁功

亞宋頴皆不得以功名終身死爵除為可慨矣江夏侯周德興之得罪也太祖宥之因誠諭公侯謂多粗暴無禮自取敗亡又謂永忠數犯法屢宥不悛然則洪武功臣之不獲保全者或亦有以自取歟楊璟胡美功雖不逮然嘗別將名著方面勲故次列之云

明史卷一百二十九

欽定四庫全書

明史卷一百二十九考證

馮勝傳趨潼關守將宵遁遂奪關

臣

嚴福按明太祖

紀書元年四月馮勝克潼關李思齊張思道遁此傳言守將宵遁而未書其名據本紀附識

馮勝傳二十年命勝為征虜大將軍

臣

嚴福按開國

臣傳云十八年拜勝大將軍傅友德藍玉副之諸公侯皆從以星變召還十九年冬再諭出師二十年春

乃北代史叙事稍畧謹識

馮勝傳勝之壻常茂在座據起砍其臂

臣嚴福按識

大錄明書茂部將趙指揮習蒙古語聞納克楚言知其謀以告茂茂遽起砍之史不詳叙似茂無故激變者謹識如左

傅友德傳還下保定真定

臣嚴福按明太祖紀書元

年九月常遇春下保定遂下真定而不書傅友德蓋友德隸遇春下紀但書主將傅乃分紀各將功績體

自不同耳附識

傅友德傳友德以五十騎衝却之因夜襲其營

臣嚴

福按友德襲庫庫營開國臣傳明書皆作五百人史作五十騎未知何據謹識

傅友德傳其年秋充征南將軍帥左副將軍藍玉右副將軍沐英將步騎三十萬征雲南

臣嚴福按明書

開國臣傳皆云友德征雲南太祖親餞龍江授以方畧其遣將起險所至有功皆稟廟謨也功成不驕歸

功於上實因太祖前後所降璽書數十懸斷萬里之外委曲中款故耳史直叙其事似友德獨斷成功不由廟算者稍為闕畧謹識

傳友德傳明年賜死臣嚴福按友德之死開國臣傳

明書皆云藍玉敗友德以功名內懼會冬宴從者徹饌不盡一蔬太祖責不敬且曰召爾二子來友德出衛士誤傳太祖語曰攜其首至頃之友德提二子首以入太祖驚曰何據爾忍人也友德出匕首袖中曰

不過欲得吾父子頭耳因自刎他書俱云暴卒史亦
不詳原委謹附識

廖永忠傳陳友諒犯龍江大呼突陣諸軍從其後大敗
之臣嚴福按獻徵錄永忠於敗友諒之後即陞同
知僉院開國臣傳亦同史畧之謹識

胡美傳次建陽守將曹復疇亦降臣嚴福按曹復疇
獻徵錄作曹俊胡美後所遣招諭未附諸州縣之來
降將即此人也但他書無可証謹附識

明史卷一百二十九考證